

光緒辛巳年重修

惠州府志

夫

惠郡城北文昌宮藏板



惠州府志卷三十三

人物五

政績下 武功附

國朝鄒興相字子璋博羅人順治甲午舉人選授清河令時有濬河之役奉公勞瘁請免災傷積逋民咸德之值歲饑捐俸賑濟全活甚眾旋以勞卒於官邑民哀之爲劇金賻焉

曾粵龍字雨田博羅人康熙丁酉舉人雍正癸丑進士

欽點吏部主事旋充會試同考官粵龍性恬淡居銓部廉潔自持人不敢干以私丁艱回籍不復出主講羅陽書院栽培後學成材者眾邑人至今思之不置

徐斯適字平川龍川人康熙戊午舉人授清江合十年士  
民戴德作絃歌譜以頌之後升淮安河務同知

何深字頃波連平人康熙丙戌進士初任湖南扶溝合以  
治聞旋丁外艱歸服闋補山東高苑合時西陲用兵深  
抵任卽請詣軍前効力轉餉沙漠往返幾二萬里不辭  
勞瘁復丁內艱起補湖南長沙合甫閱月謝病歸所著  
有出塞吟晴窗偶錄等集行於世

何多學字灘舟連平人康熙丙子舉人初授江西南康合  
充甲午鄉試同考官所薦拔皆知名士值妖人明天載  
僞符煽亂多學率練勇馳往擒之獲其渠餘黨悉散旋  
丁內艱起補山東堂邑合有政聲上憲知其才交薦之

擢武定州牧

湛上錫號亦山河源人文行兼優康熙乙卯甲子兩科皆以副榜貢有老親不欲詣國子二十七年任順德訓導朔望率諸生講上諭月兩課藝出俸錢爲諸生給紙筆供酒食始終不倦逾年講學鳳山請業不問老幼及修脯豐歉多賴指授以成官舍弊壞風雨莫蔽布衣蔬食處之晏如遷海陽諭行後諸生勒碑明倫堂以繫去思縣紳復建生祠曰湛公書院於南門外置田供祀翰林鄭際泰爲之記癸卯舉祀順德名宦

張庚陸豐人領康熙壬子鄉薦官江南清浦縣清操自勵惟以減重耗革陋規爲急務宿弊一清百姓德之

巫榮字仁伯龍川人少穎異登雍正癸丑科進士初補浙江義烏令案無留牘繼調河南西平令時西平有水患奸徒乘機劫奪榮請兵捕治百姓德之建青天祠以祀旋解組歸

陳鴻畧字敏成長甯橫崗人孝事父母老而彌篤兄弟怡怡及分產田宅相推讓雍正初以廩貢授高州訓導在任十七載廉謹恬澹教育殷勤上憲嘉之陞新會教諭飭躬課士一如高州時凡五載捐俸助修學宮貧生無資者分俸給之兩地生徒各題匾贈頌告歸年七十八

卒

潘維宰字儘生長甯新南人由歲貢任程鄉平遠訓導凡

六年以道德化人廉而勤於其職致仕歸兩袖風清多  
士欽雅範焉

徐廷芳字蘭先和平人康熙壬戌進士有學行爲諸生時  
卽主五雲書院邑人朱超玟曾震登毛際博等皆從遊  
旣捷鄉會歷任新甯肇慶南雄教官皆兼各書院山長  
所刊端溪學約凌江學規允足爲多士式及知扶風縣  
年已六十四矣革浮征杜濫比弊絕風清時值金川用  
兵限內應辦軍需不絲毫派累以年老改教歸士民立  
碑誌去思焉壽九十三著有逢源齋集

蕭維藻字補溪河源人雍正壬子舉人丁巳 恩科明通  
進士授英德教諭日進諸生於明倫堂課以忠孝大節

戶外之屨恒滿有貧不自給者分俸金以資其乏大吏嘉其賢保舉卓異卒祀名宦子聚岳廩膳生聚岳子寶樹副貢生皆有學行而寶樹尤以書畫名

黃宏字文富龍川人由進士任浙江永康縣興學校除宿弊百廢具舉旋調太平令剔釐浮糧尤多善政以勞瘁卒於官兩邑人哀思之

邱卿雲字春岫龍川人由拔貢領順天鄉薦出宰甘肅薦升狄道州牧值歲饑力籌賑濟全活甚眾以勞卒於任謝汝佩字崑山龍川人乾隆庚辰舉人由香山教選授山西天鎮縣時邑中丁糧苦差追呼民多逃竄汝佩詳請咨部移丁糧歸民田部允所請民賴以安嚴禁溺女復



捐俸建留養局此風遂改民有慈母之頌焉

何蕃輔字宇垣號椒谷長甯治溪崗人乾隆甲寅舉於鄉  
聰慧通經嘗五上春官兩薦不第輦下諸公欽其品行  
學識薦主直隸天雄明道兩書院一時英俊被裁成者  
多取科第以去嘉慶丁丑授徐聞教諭調補儋州學正  
兩學士子咸仰甄陶列憲嘉其廉能薦陞知縣部覆下  
而卒所遺文稿邑人猶樂誦之

鄧見龍字爐峯歸善人乾隆甲寅舉人任潮州大埔學訓  
導幼聰穎其爲學恪守程朱語錄不言而躬行尤謹孝  
道父母八旬相繼歿見龍年周花甲猶作孺子啼擗踊  
殯葬一於禮其居家接物全是一團和氣生平未見其

疾言遽色在官尤篤愛士子大埔地瘠人貧士之來謁者不責贄儀恆引進教訓學舍常滿春風一座藹如也上游器重毫不干以私飲人以和以故埔之士夫以及商民婦孺無不親之戊寅歲卒於官諸生爲位朝夕哭迨歸葬埔人士含哀致祭沿路不絕白衣冠者數千人至今尤稱道不衰實其盛德有以感人終不可誼云

謝良翰字廣善連平州人由明經任廣州司訓擢廣西宣化教諭調南甯府教授所至課士有聲特升新甯州牧刑清政簡吏民懷畏以病歸民攀轅泣送之

趙師質字彬文長甯人讀書通大義有膽畧援例選授山東兗州府通判調判江蘇淮安府官於淮者二十四年

著有政績乾隆間恭遇

聖駕南巡

上垂問賜

貂皮宮緞各物甚渥署沛縣時石凌口決居民漂沒質  
督吏役立風雨中築堤防不避辛苦百姓罹災者不待  
牒覆卽開倉賑之曰沛距省數百里待覆至則民轉溝  
壑矣制府勘其狀大相嘉賞由是名大振旋署泰州海  
州江甯高郵諸邑皆以賑務著聲泰州北門河水深廣  
民病涉質出貲造橋以便行者人稱趙公橋河廳黎某  
獲罪籍沒眷留淮寓相繼喪亡者三十六棺皆爲營葬  
撫其遺孤存恤甚備俸滿陞四川順慶府同知尋陞江  
西袁州府蒞任悉以清治乾隆四十八年致仕歸

趙希璜字渭川長甯人乾隆己亥舉人官陝西延川永壽

等縣調補河南安陽知縣捐廉助諸生膏火修安陽誌  
濬萬金渠善政具舉每征收國課輒屏去騶從單騎郊  
外民不驚擾而疾苦周知涖任十年循聲卓著卒祀名  
宦希璜工吟詠少讀書羅浮噓吸烟霞灑滄肌骨故其  
詩絕無塵俗氣嘗爲黃仲則刊全集風義尤篤所著有  
四百三十二峯草堂詩鈔研筏齋文集五經文字通正  
書安陽金石錄

鄭永鐸字則亭河源人以舉人任開平教諭遷安徽和州  
同知歷宰含山來安全椒等縣年七十有六卒於官鐸  
廉潔自矢仕宦數十載不名一錢及其卒也囊橐蕭然  
幾無以殯同官購之始得歸葬著有篤輝堂文稿

李文起字綱齋歸善人斌次子十三歲卽善屬文中乾隆  
乙卯舉人連捷成進士庚寅宰山西汾陽縣陋規數千  
金悉卻之折獄明決人不敢欺有奸民某素工刀筆倚  
巨紳爲援武斷鄉曲文起廉得實置之法修汾陽縣誌  
護理汾州府篆新府學宮癸巳調宰壽陽去任之日攀  
轅者道途幾滿壽陽爲山西孔道往來供張向皆取給  
於民文起悉革其弊大兵征金川尅令供馬萬匹邑民  
奔赴襄助一時遂足其數厯宰文水太谷靜樂芮城平  
陸廣靈右玉等縣特授壽陽知縣緣事罷職尋 恩復  
原官乞休歸里不名一錢年七十卒於家生平好獎勵  
後進嘗主講惠陽拔陳允謙於寒士中資以膏火不數

年遂舉於鄉其樂育英才多類此弟文瀚字錦瀾乾隆  
壬寅援例選授福建按察司經歷署興化通判興化知  
府安溪知縣有政聲卒於經歷本任

蕭炳揚字薰壇河源人嘉慶丁卯舉人知河南原武縣時  
原武連歲凶歉炳揚緩其征復自解廉金賑濟饑饉其  
能蘇民困有如此炳揚之初至原武也值祥符河決未  
幾中牟又決炳揚疊奉檄往援運粟發給災民多所全  
活以勞加知州銜乞休歸里主講槎江卒於家年七十

一

陳殿元字瀛賓歸善人乾隆乙酉拔貢少有夙慧博學能  
文作爲詩歌亦躋古人堂與欽州馮敏昌殿元同年友

也夙負文名談藝少所許可殿元有所作未嘗不擊節稱賞性情閒逸精通琴韻及篆隸石刻諸小技晚官合浦教諭竭誠課士鄰邑重其學行多往從之游數年卒於官合人每思慕之行載合浦誌堂弟鼎元字鐵崖廩生有文名乾隆壬寅與殿元同修縣誌邑令章壽彭禮重之

廖鳴球字韻壇河源人乾隆癸卯舉人性聰敏品端學粹尤長於詩爲諸生時試輒冠其曹以大挑一等出宰江蘇寶應建小學立詩社殷勤課督一時才士多賴其裁成墾田八百餘畝民於其地樹碣紀實調宰如皋修嶺山書院增廣膏火購置書籍復於水繪園知味軒等處

與多士論詩談藝充戊午江南同考官歷署北捕通判  
江甯同知解組歸宦橐蕭然闢夢草堂以居猶如寒士  
會爛屐四亂作球率鄉民增築城垣以資守禦未幾大  
吏委令牛某與邑令祝某清丈河源田土當事者操之  
過促致興先斬竹後殺牛之謠球力請於官其事始寢  
晚年主講槎江視生徒如子弟故論師範者咸稱道勿  
誼云卒於家著有夢草堂詩稿

曾奏南字作周博羅人乾隆辛酉舉人任山西靜樂縣政  
尚清簡民不擾興學校拔取皆知名士解組日士民攀  
轅泣留焉

顏希深字若愚連平人幼穎絕器宇凝重暨長勵廉節達



時務意岸如也乾隆己巳由川運例任山西太原同知  
恭辦 駕幸五臺行營諸事毫不擾民癸酉擢山東泰  
安府建考棚設書院嚴察徵漕浮收之弊恭遇 東巡

召對 行在 高宗純皇帝有顏希深他時可大用

之褒調濟南開烏龍河得膏田百餘頃遷督糧道值德  
州大水不俟請發賑全活萬計壬午 特旨補授川臬

會入 對 上詢知希深母老調補江西按察使希深

感激 恩遇抵任清理積案五百餘事囹圄多空厯福

建江西布政使丁內艱歸適州大饑捐廉俸所餘設法

助賑起補前缺辛卯復丁父憂服闋入 覲時金川逆

酋負固 命希深馳赴四川角木交辦糧務先是 大

兵雲集定西將軍阿桂等分西南北三路進剿角木交者當北路軍營後路陡入賊境爲險要必爭之地也希深馳傳至飛輓糧儲不絕於道諸軍無後顧慮於是有人入之志希深因疏言木地糧臺限於山勢不能與營盤毗連且防兵單弱請添派兵丁闢地安營隨時操演以輟賊勢而壯軍威又請增設礮卡斷賊之來斫伐林箐防賊之伏疏人均蒙 嘉允隨 賞戴花翎旣而

大兵連克賊礮乙未冬定西將軍等率師深入時山重雪積挽運維艱希深催趨拊循露宿者十有二夜以故糧隨兵進軍聲赫然大功告蕪凱 聞留蜀督辦軍需奏銷事宜明年擢湖南巡撫初湖南吏治廢弛希深下

車整飭又奏立普濟堂歲養老民五百名口潔已率屬  
治尙清平楚民愛之戊戌內擢兵部右侍郎尋轉左庚  
子命署黔撫移署滇撫旋補黔撫以勞瘁卒於官希  
深起自海隅清操淬勵以是荷主知而肩大任中外  
敷歷夙夜匪懈心跡雙清表聞天子悼惜恩賜  
有加黔民相弔有泣下者

顏檢字惺甫連平人父希琛官至巡撫檢登乾隆丁酉拔  
貢廷試授禮部七品京官洊陞郎中檢以名父子夙  
爲高廟所知居郎署持大體不拘文法先是外省節  
婦請旌須州縣申請多需索稽延檢請以同鄉恩賜

結驗給著爲令扈蹕灤陽校射連中四矢賞戴恩賜

以京察最出守吉安抵任劾墨吏懲蠹役一郡肅然遷  
雲南鹽法道調迤南權按察使時安南夷民擾邊界邊  
吏以反聞城門晝閉民驚竄大吏將入告且大舉問罪  
檢曰安南新附必不敢爾檢願佩兵符往詰否則檢能  
安之母開邊釁苦吾民大吏許之檢馳赴開化道見竄  
者累累詢無反狀但曰大軍將至相率走耳檢悉令人  
城鎮將遣阻不得夜抵城下揚鞭笑謂守者曰城外蘭  
若桂始放欲一賞玩門毋鑰也詰旦按轡入城遂令撤  
防屬鎮將守城自率二十騎偵賊至則詰擾邊狀檄國  
王立界石約不得犯境國王惶懼如約事定福文襄嘆  
曰此真封疆才能世其家矣威遠裸黑札杜反或誘之

降已凱旋檢曰札杜數反今又示弱患未艾也未幾果  
畔督府奏飭檢偕提督往平之一月三戰擒札杜盡俘  
其獍以脅從例徒之不妄戮一人授江西按察使執法  
嚴遇重囚則哀矜惻怛多所平反遷直隸布政使時三  
省教匪未靖軍書旁午部署井然授河南巡撫選能吏  
捕紅鬚賊窮其黨尋授直隸總督加兵部尙書銜 賞  
穿黃馬褂永定河三汛安瀾 加太子少保銜因易州  
虧庫事罣吏議降主事銜詣 吉地効力嗣命赴南河  
工次又以直隸藩司任內坐失察書吏謫戍烏魯木齊  
以河工要需 召還補戶部主事尋授貴州巡撫緣事  
降三品京堂復以直隸失察邪匪降部郎旋授山東鹽

運使卽擢浙江巡撫時值林清亂後多株連立毀其簿  
民賴以安坐庇所屬落職回籍未幾擢閩浙總督閩中  
歲貢建蘭荔支久爲民累 上亟欲禁絕適疏請罷深  
契 聖意有 旨嘉獎復督直隸旋內召署工禮二部  
侍郎權順天府府尹授戶部侍郎調倉場改漕督以河  
淤漕滯降三品銜後以五品銜休致卒於其子伯燾直  
隸藩司官署

顏伯燾字魯輿連平人嘉慶庚午舉京兆甲戌成進士

欽點翰林院庶吉士改編修戊寅 命典四川鄉試旋

京察一等 授陝西延榆綏道榆林古朔方地民椎魯

未知絃誦土田磽确公私凋敝伯燾輕車減從謝供應

革陋規廉俸外不名一錢性仁慈治獄平恕獨於土匪  
嚴懲之盜賊歛迹修書院遴士之尤秀者肄業其中膏  
火外優其獎賞由是文風蒸蒸日上榆溪濱河倡議大  
開水利築隄備旱澇歲溉民田二百餘頃至今猶食其  
利且其地人貧俗褊戶鮮蓋藏雨暘偶愆卽流殍盈路  
倡捐豐備倉春借秋還時其豐歉雖遇歲饑民不至重  
困調補糧道旋陞按察使遇事悉心精覈多所平反尋  
簡授甘肅布政使時回疆甫收大兵凱撤入關設立  
軍需總局一切供億犒賞措理裕如奉 旨賞戴花翎  
督辦總局報銷伯壽通達事理鉤稽筭人不敢欺計  
蘭肅兩局請銷官兵進征凱撤八十五案其合例報銷

者三百十七萬兩有奇節省銀四十三萬八千兩有奇帑不虛糜官無賠累事竣得 溫旨獎勵調直隸布政使復奉 旨署理陝西巡撫馳驛赴任途次 命往肅州會同制府總辦軍需嗣逆回廓清奉 旨仍回直隸本任丁父艱服闋入都復 授直藩旋 簡授雲南巡撫時禁烟令下有 旨直省督撫議奏伯燾密陳以爲鴉片例禁本有專條但當申明舊章無須另頒新法疏入 留中未幾陞 授閩浙總督時暎夷犯順因廈門失守奉 旨革職伯燾性穎悟博極羣書公餘之暇著有求真是齋詩草書字彙草書歌訣等集尋卒

何南鈺字相文博羅人少穎悟博極羣書登乾隆己酉科



舉人嘉慶己未進士改翰林院庶吉士充實錄館纂修  
乙丑會試同考官旋擢河南道監察御史時粵東海寇  
張保憇鄭一嫂等猖獗海上劫掠商船及沿海居民無  
算南鈺奏請斷賊接濟并於東西中三路隘口添兵嚴  
卡如其言賊果困隨投誠焉轉掌浙江道巡視北城未  
幾授雲南臨安府甫下車惟以興利除弊爲急務楊逢  
春臨安盜魁也謀不軌南鈺偵知之密稟制軍委營弁  
乘夜潛捕獲盜首及其黨二十餘人鞠實分別置之法  
安屬嘗我縣被水捐廉倡卹民忘其災舉卓異委署糧  
儲迤東各道所在有聲回籍日士民攀轅泣留者以千  
計著有範經堂文集燕滇雪迹詩集行於世後卒於家

楊廷釗字邦侯龍川人乾隆甲子舉人有文行掌教三台  
書院垂十年課士以實邑人士多賴裁成旋任福建龍  
巖州州同潔已愛民丁酉己亥分校閩閩兩科解元俱  
出門下尋以疾乞歸卒於家門人伊秉綬爲之銘其墓  
蕭聚崑河源人例貢生以捐納授四川綿竹令調宰湖南  
邵陽革積弊裁陋規修邵陽縣志政聲卓著旋宰善化  
時諸路大兵往征緬甸道出湖南軍需孔亟大吏一以  
委崑崑措置裕如克稱其識大吏獎以治最荆南扁厯  
署郴州直隸州靖州知州尋卒

潘世拔字月華河源人由廩貢厯署樂昌崖州南雄等學  
訓導遷浙江武康知縣廉潔明敏興利除弊民咸懷之

以卓異薦升鹽運同知母憂歸里恤難濟貧鄉人咸感其德卒年六十四

任建綸字襄閣歸善人由廩生登嘉慶辛酉科舉人值博邑陳爛屐四作亂惠城戒嚴建綸奉府諭圍練率勇

登陴晝夜防堵無少懈事平以功授江西建昌令甫蒞任惟以興學校勸農桑爲急務修學宮廣生童膏火培植士類歲旱民被災建綸詳請緩征開倉賑濟全活無算舉卓異調南城未赴任以憂去回籍日士民遮道泣留之

陳鴻猷字蔚其歸善人已酉拔貢甲寅舉於鄉嘉慶間寇張保倡亂外洋蹂躪瀕海諸鄉鴻猷率鄉人禦之復言

諸當道擇海港隘口出資創築靖安礮臺以扼盜出沒  
海氛遂息惠守伊秉綬遷惠陽書院於豐湖鳩工集費  
悉鴻猷所贊助任高明訓導卒於官生平工書人得其  
寸楮咸寶之

鄧際昌字亦樵永安人癸酉拔貢戊寅舉人授大埔訓導  
少苦學能文勇於任事爲諸生時嘗率鄉勇隨郡守楊  
楷剿平鐵籠嶂巨盜比官大埔值諸生某同室聚訟數  
年不休際昌召至反覆開導遂和好如初其解息爭訟  
多類此年五十八卒於官著有菊人詩鈔菊人雜存弟  
繼昌字鷺賓乙酉拔貢著有塵中草

呂龍光字慕津一字賓南歸善人少負雋才博通經史援

筆千言立就未弱冠補弟子員有聲庠序尋領戊辰鄉  
薦道光壬午舉會試第一以知縣分發四川宰永甯旋  
授峩眉合峩眉向有兄死妻嫂之俗龍光大申其禁置  
犯者於理不數月俗遂革出廉金創置峩山書院膏火  
教養多士峩山舊有山志殘缺失次龍光搜葺編補始  
成全書兩充四川戊子乙酉同考官簡拔悉當卒於任  
年五十有三

練廷璜字立人連平人道光乙酉拔貢 朝考以知縣用

簽分江蘇歷署劇縣所在有聲調補江陰獲要犯奉

旨以知州陞用旋署嘉定值英夷犯浙蘇戒嚴廷璜奉  
檄團練未幾寶山失守上海隨陷英夷揚言攻嘉定幕

中客皆辭去廷璜屹不動益激昂慷慨晝夜登陴守禦  
無少懈夷聞之卒不敢犯保舉入都引見蒙召對  
二次天恩優渥實異數也陞授松江府守松四年政  
尚清簡民不擾緣事罷職後開復原官尋卒

陳文杰原名定文字旭齋博羅人嘉慶戊寅舉人充國史  
館膳錄授儀徵知縣文杰聰慧能文精於衡鑒在儀徵  
所取士類皆掇巍科躋顯宦故一時談文者咸奉爲師  
表焉嘗考試童子有舉人某爲某持金二千請以第一  
人送院文杰峻拒之戒門者勿復與通又有富室某陷  
殺人獄密致五千金文杰笑曰吾豈受賄者若果無罪  
何懼爲反金而釋其獄其潔已愛人多此類也緣事罷

職捐復原官加知州銜年七十餘卒於家

蔡應嵩字嶽生一字少彭歸善人祖步蟾父維新皆例貢  
有隱德應嵩穎悟能文道光庚子舉人丁未進士以知  
縣分發江西己酉宰安義以德化民不尙苛刻新文山  
書院鬮髮逆亂作舉行團練咸豐癸丑宰臨川時髮逆  
竄陷江右數十郡縣直逼省垣應嵩練民防守賊無敢  
犯其境者復製造火器運濟省垣事平加同知銜 賞

戴藍翎江右向少戰艦應嵩奉大府命監造仿粵東制  
度手自繪圖指授羣匠製成悉協於用甲寅宰豐城邑  
大饑倡修陂隄以工代賑擢知袁贛二府事授山東登  
州知府未任奉兩江總督曾國藩奏調回粵襄辦釐金

二年之間轉餉江南數逾百萬同治甲子署吉贛南甯道簡放廣饒九南道會贛寇復熾仍留贛任應嵩部署兵勇分水陸四軍防堵諸隘遣兵解甯都圍以勞卒於官年五十照軍營病故例議卹追贈光祿寺卿廕一子入監應嵩有知人鑑兩充江西鄉試同考官所得多知名士著有文集十卷祀贛州懷棠祠

黃振成字韶九歸善人道光丙午舉人狀貌雄偉智識開朗咸豐初大挑二等以教職用從軍江右克復南康饒州撫州東鄉等城洵授吳城鎮同知厯署義甯州知州瑞州建昌九江等府同知事在官多所興革初莅義甯時兵燹後繼以饑荒民多流徙振成勞來安集捐廉賑



米復倡捐書院膏火士民咸頌德焉九江北岸隄決民  
被災爲請帑二萬餘金修築完固人呼黃公隄吳城素  
多盜自振成莅任設團防嚴緝捕奸宄屏跡同治五年  
江省肅清叙功以知府用換孔雀翎八年緝獲湖北劇  
盜奉

旨以道員留江補用加三品銜捐請二品封典因母老乞  
養歸吳城士民攀轅不獲泐去思碑於望湖亭振成工  
詩畫求索者戶屢恒滿輒立應之著有怡園詩集行世  
卒於家年六十有一

附武功

明周建邵字娛溪連平人嘉靖間賊首陳東六蹂躪村邑

建邵練鄉壯自行擒剿以功劄委都司職銜時翁河二  
邑劇賊李亞元等踞橫坑巢建邵隨總兵王輔世進剿  
衝鋒陷陣斬馘無算河頭賊包龍山等聞之喪膽詣建  
邵軍營請降未幾游賊譚炯擾亂建邵擊平之復奉檄  
與總兵都司等會剿唐亞六悉掃其穴升叅將旋以老  
告歸不復出

國朝王應詔歸善人由行伍洊擢電白都司隨提督孫全  
謀征海寇張保仔伏兵港中焚溺賊舟百餘艘渠魁就  
擒遂降其馱論功升水師右營遊擊應詔之官電白也  
嘗出廉金七千創修東門外道路三百餘里築亭其旁  
爲行人憩息之所士民德之建祠奉祀以老致仕年八

十六卒於家次子毅斌官至陽江總兵

蕭鳳來歸善人狀貌魁梧挽強命中乾隆甲辰登武進士  
第以守備分發貴州旋升清江協都司嘉慶三年從征  
四川教匪在廣元開縣南江大平等縣連年轉戰凡百  
八十有七次迭獲勝仗擒斬匪首六名餘匪無算 賞  
戴孔雀翎洵擢廣西平樂協副將十四年調新太協副  
將歷署左江右江等鎮總兵二十年升右江總兵丁內  
外憂遂乞休不出鳳來雖官武將而雅愛翰墨手輯族  
譜復購置墓田爲祭祀費年七十有二卒

殷佐良字耕巖博羅人由歸善充伍拔補順德都司乾隆  
五十二年臺灣林爽文亂調佐良隨征所向皆捷事平

以游擊升用委署平海營叅將復檄巡高廉地方盜賊  
斂迹未幾有安南黎阮之變總督孫士毅帥師往剿以  
佐良曾立功臺灣也調營差遣至則阮惠乞降尋任新  
塘游擊值黔楚逆苗蠢動羽書徵軍火當道檄佐良載  
數百艘馳往荊州克濟軍急旋西隆逆苗復煽亂蔓延  
粵西隨總督吉慶往平之以功委署潯州協調署提標  
中軍護理提篆以病告歸復有博羅陳爛屐四之亂佐  
良爲桑梓地出佐吉慶攻之平其巢逆首伏法事聞  
賞戴花翎不復出

余得彪歸善人軀幹雄偉器量過人少貧負販顧不及汲  
於利遂棄去充伍嘉慶元年從征湖南苗匪調征湖北

陝西四川各省教匪身經百戰皆奮勇爭先七年凱旋授新會千總洊升崖州叅將香山副將陽江總兵道光十一年征八排不戒於火失利降都司歷署順德副將瓊州新會等營叅將以老乞休寄居順德年七十有奇卒得彪性揮霍周恤士卒委曲懇至故士卒樂爲之用威懾羣盜搜捕靡遺所得俸金購置田宅悉以與其兄復爲兄子延師課讀子殿材官至碣石總兵

附興甯長樂縣

宋羅孟郊其先南昌人五代間有官興甯者因家焉郊生而穎異早喪父事母孝先時牧牛長陂莊坐讀書有山人過奇之與語郊告以父喪貧未葬山人示之地葬焉

弱冠結廬羅嶺以學鄉子弟從之指授篤至邑始多學者善書札洗硯池水盡黑人稱墨池天聖八年舉進士第三累官諫議大夫翰林學士乞歸養茆葦蕭然母冬月思鱸郊輒解衣入池取魚供母人目其池爲會子湖卒眾立祠祀之

明古彥輝長樂人洪武中歲貢授福建德化主簿性敏果習吏事識大體不尙苛察勸課農桑民服其令會溪流暴漲民苦蕩析無甯居彥暉撫之邑中忘其災擢監察御史風裁焯著按江西聞其弟至卽命州縣驅之出境時高廟英明彥暉居職敢諫不避權貴人咸難之卒於官囊橐蕭然惟諫草盈篋而已今祀德化名宦祠

壬寅志按

縣志彥暉自縣丞遷知縣乃擢御史今止云  
任主簿豈以德化志考定如此姑附議之

李通長樂人成化間由監生授長泰令梗介無私與俗多  
忤殫心撫字不趨權勢後以年老致仕爲人恭而有禮  
義訓子弟亦然

曾奎中興甯人宏治壬子舉人初授來賓教諭謫廬陵訓  
導轉國子學正勤其職遷吉安通判不阿權勢改思恩  
又改夔州親戚止之毅然曰既有命敢自便耶卽單車  
涖任發奸如神吏民懾服三載辭歸角巾野服讀書賦  
詩外時乘黃犢出遊訪其淡樸如此

郭大治興甯人嘉靖十五年貢刺雲南霑益州除盜單車  
貨利州境宿寇充斥廉得其實立斃杖下有劇寇書賦

金求賒死卽申文戮之銓司覈治狀將陞遷以兵使者有憾竟掛議歸州民咸尸祝之

李元鳳興甯人嘉靖丙午舉人丙辰明通進士忠直慷慨有大節尤善兵畧嘉靖四十四年流寇猖獗監司總戎每事必咨詢焉合富川山獠梗化奏請平之隆慶四年興甯衙役鍾道侯位僧官惠亮等謀叛元鳳時家居言於合不悟危在旦夕會郡別駕陳廷觀往潮元鳳密請至邑悉擒治邑賴以全元年大饑賑穀千餘邑有不平卽挺身昌言不避忌諱論者謂其智勇能斷惜用不竟其才

鍾道長樂人性簡易不事外飾與人交峭直無所撓嘉靖



壬子鄉薦歷官民部員外郎監北津關稅黃門某勢張甚家以數十艘自隨匿不估算道悉算如法受代贏三千餘金盡輸大農不私一錢進水部尚書郎前黃門某傾之免官歸

陳詔興甯人萬歷十八年選貢有器宇與兄謀俱以孝友聞初授臨海丞不挈家眷六載一僕司爨食無兼味笥無羨錢萬侍御崇德賞其廉幹薦陞瑞昌令瑞界楚黃逋寇負隅兩省議剿詔獨廉其魁虜之全活甚眾瑞氏至今尸祝焉致政歸做廬一區非公不至誠子孫毋失爲廉吏後而已

周遵長樂人幼失怙恃奮志讀書貢入國學授蜀大竹令

五載造士愛民邑稱慈母上計留部出守華州能其官  
有兩地循良之譽丁祖母艱服闋怡情詩酒不復赴嗣  
以檄書敦逼勉入都卒子昌明藤縣司訓護榷歸

王泌興甯人沈靜好學萬厯閒選貢初任長樂縣務釐政  
清鄰邑昭平有構獯煽釁逋賦者泌攝之黥其首餘置  
勿問昭民德而祠之進刺養利州民夷雜處撫之無梗  
化遷南甯司馬視邕廠一季捐俸百餘償稅額攝本郡  
大平思明三篆一介不取思明有祿酋何情竊據平莽  
泌往治卽歸地請罪兩賜褒封家居多善事縣欲取田  
丁穀讜言止之人尤德焉

李焯長樂人乙榜簡拔入成均授闕永福令以化民成俗

爲務講說六諭諸如開古松路造浮橋議築城建文昌  
書院修補邑志皆可稱尋以親老棄官歸陶然自得日  
惟碁酒歌詠所著有永福政書鳴琴調北遊草南鯤洞  
等集

徐卽震字英卿長樂人萬厯乙卯鄉薦性剛介不尙侈靡  
任雲南永昌推官執法不撓精敏於治奉征土司馬一  
駿以功陞郡丞政績益著昌多曠土教民築坡椿輪水  
車昌民德之爲立祠以父九旬乞養歸數載城陷被賊  
執不屈罵益厲遂見害



惠州府志卷三十四

人物

儒林

宋梁昭德歸善人政和中以三禮出身授循州僉判有治狀與邑人陳伯修李文輔爲友鄉黨重之號曰三善士唐庚謫惠交遊甚密庚復官北歸爲賦三子詩

詩曰歸心如躍馬奮迅不可駐別情如放猿已去猶返顧三年孺子社數借柱史書好在五噫殮善保千金軀舊來談天口老去盡地力萬里不相忘寄聲問眠食

潘預字晉卿博羅人篤學該洽以古文爲鄉黨推重尤邃

儒林

於易三山林東負時名少許可及抵羅浮見預論易遂  
爲之屈乾道中以特科授宜州司法參軍時龔茂良帥  
廣聘至番禺訓迪諸生南州經學自是日盛祀郡邑鄉  
賢

梁應龍博羅人貧而好學嘗欲市書而困於錢輒惋惜其  
母怪而訊焉告以故母因解所服簪珥與之登嘉熙二  
年進士第時榜下有落第者皆哭應龍亦哭或問之答  
曰本欲苟祿養親今僥倖一第而親已歿是以痛耳性  
不嗜進取厯仕廣西二十年始改常德僉判以歸惠倅  
單崔明者嘗學於應龍至是盛飾車騎往拜之應龍不  
懌自是崔明造其廬必屏導從其嚴毅如此居家淡泊

不俯仰於人暮年貧苦不改其節祀邑鄉賢

明范伯可海豐人洪武初舉明經授本縣儒學訓導勤於講授閑居衣冠危坐終日無惰容雖祁寒暑雨手不釋卷人服其勤謹清修云祀邑鄉賢

李亨字嘉會博羅人以春秋舉永樂甲午鄉試戊戌會試乙科授廣西博白教諭改四川珙縣遷國子監學正亨博學能文居官勤於講授謂五經惟春秋屬辭比事難見要領迺撮其大指爲一編曰麟經管中豹謂諸史浩繁非初學所能盡讀復撮取其要爲一編曰青史節要以便講習課試之文或背理違式親爲筆削少有進益則加獎激於是學者競勸博白暨珙人文漸興實亨倡

之

黃汝隆字公大博羅人淹貫經籍執經門下者多顯仕成  
化丁酉舉人令長汀鋤強撫弱好培養人材既歸日與  
鄉老輩徜徉山水飲酒賦詩效香山溫公結耆樂會著  
有著樂集歸田稿子天爵以鄉薦令信豐及孫會另有  
傳

鄭貴濂字宗周歸善人幼孤貧自諸生時與同舍生官文  
韶講白沙之學宏治舉於鄉授福建南平縣卽以所學  
教其人而興利革弊不務炫耀人稱長者遷南昌通判  
值宸濠變嘗捕逆黨誅之丁內艱起補慶遠厯荊州所  
至有善政民稱鄭菩薩遷雲南趙州知州卒於官祀郡



邑鄉賢

何倣字子勗龍川人以舉人授陸川知縣陸川多盜倣設方畧弭之陞判福州到任五日解官歸不閱月有獄囚之變上官多罹之倣若有先見者嘗以祖遺田宅讓諸弟慕謫官李中勁節時造訪之與黃宸立鄉約教諸士人洪御史垣張督學希舉交重之

鍾經字子常龍川人以太學生舉於鄉質訥有雅致韞櫝六經服膺道術生徒執經講解不輟黃宸何倣皆出其門生平率禮不越親歿廬墓終制赴南宮道卒學者多悲慕之

何達字子成博羅人七歲充郡庠生號奇童四十餘以貢

授福建光澤縣訓導光澤僻在山間人鮮知學達誘教  
有方學者日衆一時豪暴化之擢楚府永安王教授楚  
諸王交重之未幾棄官歸徜徉林下二十年卒又十年  
光澤門人官凝秀泊南海校錄遺文而序之曰先生教  
吾澤九載訓士以聖賢之學陋習一新文風日起至今  
諸生思慕不已舉祀名宦

楊天祥字休徵祖博羅泊頭人遷歸善塔子湖生天祥長  
而苦學讀書白鶴峯晝不踰闕夜不牀席雖事至物來  
一切不問爲文操筆千言悉有根據正德丁卯鄉試第  
八至甲戌下第省父於膠州誦書官舍聲琅琅徹衢道  
膠人至今傳之其平生無暇日無書不讀丁丑成進士

書示友人及諸昆弟曰古人讀書破萬卷子自弱冠厲志讀書至今十五年一年之中除令節家慶及疾病之日不過六十日其三百日皆誦讀日不下三簡一年不下九百簡十有五年不下一萬五千簡方之古人萬卷僅十之一二然以近世較之予猶爲多而場屋之中所取甚約何者七篇之文如其黍度而止五策之文如其條貫而止論雖可肆亦有步驟不得大騁至大廷之對檢點敬慎且晷刻有限難以盡展譬之珍饈錯陳屬饜則止巨木輪困就墨則削其餘應酬不能踰於人情物理擬古則迂反古則倍讀書雖多豈盡可用哉古人云精兵三千足敵羸卒百萬蓋以此也昔向子平救斷家

事徧遊五岳豈圖喻人哉亦求自喻而已然遊五岳則有跋涉之苦離曠之憂踰年越歲僅乃遍之五經備天地萬物之理此五岳也子史百家亦洞天福地也子讀之每徹一書心曠神怡視聽俱新顧不出戶庭者十餘年遍之矣雖不足以喻人亦足以自喻矣時人見其書以爲名言選官戶曹差通州督運遣迎妻子未幾卒爲人方正不可以私干在通州有糧長餽一金硯峻拒之及卒囊無餘貲同年舉賻乃得歸一生惟讀書之日多居官之日少今學人能言之者率其苦學之事云祀郡邑鄉賢

楊天禎字善徵天祥第五弟生而穎異年十四補郡庠卽

毅然以聖賢自待識見如老成人一時才士劉子龍劉  
梧葉時葉天祐輩以氣義相契合魏校視學賢麥登取  
爲諸生式登遂抗顏作師士氣爲之頓喪天禎恥之及  
子龍輩五六人不屑趨附登竟媒孽其短盡削籍校實  
不察也後各以所學成名推重邦邑惟天禎株守窮巷  
依乎中庸終日坐一竹床手不釋卷有得卽據床書之  
妻子雜作於前雞犬洞污於側而筆硯自如其治尙書  
獨到凡就學者皆訓講有方是以多所成就處家和而  
有威或觴酒豆肉之遺卽召諸弟姪共享諸弟姪有過  
不敢使天禎知亦無疾言厲色而其人立若無所容  
者友至亦惟竹床坐對酒脯言歡竟日不倦每出里巷

藍服疏履莫不指目嚴重之年僅三十七而卒鄉人識與不識皆稱慕之

胡定字子學博羅人少爲諸生私淑白沙陳獻章與邑人曾確友善相砥以學行履純謹詩辭清婉嘉靖初次當歲貢督學使知定學行特留應試定以時命自安固辭後任建甯府學訓導教本躬行遷教諭不赴卒於家

黃宸字拱宸龍川人縉孫也正德中貢授洛容知縣遷仙游俱有惠政性剛介不回或投私禮卽對使還之勇退家居躬行鄉約按使者洪垣隆禮之以爲可回薄習嘗修仙游和平諸邑志祀鄉賢

葉時字允中歸善下郭人年十五爲諸生以不附麥登與

楊天祿劉梧葉天祐俱削籍退而益治其學父性嚴以  
其兄放縱繫之兄恚死時請持服弗許乃私哭於墓私  
爲之服父嘗受誣繫獄時請代三月而疾作弟復請代  
郡守陳公祥嘉其孝義出於一門父病侍醫甚謹執喪  
甚哀拜墓哭忌日哭終其身祭祀夫婦必親事雖至細  
不假手於人朔望率男婦廟謁然後受男婦謁誕日夫  
婦迭賓主再拜上壽然後男婦更上壽盡歡而罷諸女  
歸皆醮戒辭於策令習之著陽教書訓男陰教書訓女  
及婦授子芻以孝經考註勉以聖賢少師南海龐弼唐  
嵩後揚陽薛中離侃至時與謝憲迎而館於西湖禪林  
又使芻師之薛還揭陽特率芻送至清溪越歲薛歿爲

位哭復臨其墓自是篤信良知之學述遺旨作大學解  
錄濂溪明道象山白沙陽明中離詩諷詠之稱六先生  
見道詩時和易而正直喜恬嘿自製中正冠服必有銘  
惠陽稱家範首下郭葉氏云葉春及亦曰惠江之學造  
於夫婦蓋以身行其教者

按通志嘉靖中給事中李來鳳奏比年督學使者不  
務檢式校藝而專事苛刻豪傑之士傷於詆欺之文  
臣甚痛之請湔洗宗伯夏公言議如章詔下郡邑於  
是博士弟子論上郡守蔣淦起時時曰聖賢之道求  
諸心而已心無愧陋巷安焉不然軒冕糞土也公往  
矣吾將求諸吾心作西銘說淦旣退學益專嘉靖辛



丑詣闕上十八策并集古訓獻之年六十六卒

葉天祐字克常歸善萬石坊人少補弟子員與謝憲劉梧同舍合志聖賢之學淹貫羣籍文日益有名大司空天台黃燠謫郡司理得之喜曰吾得葉生何如吳公於賈誼哉屢試行省不應令會父捐館遂上書謝博士去天祐生而醇謹爲學一稟程朱不隨不激教人必先孝弟自灑掃應對至於性命之際學者翕然從之生平嚴重不苟訾笑而出於樂易酒後耳熱或高拱而歌翩翩乎僊也事繼母及處異母兄弟咸得其心訓諸姪如己子尤奇許夢熊居鄉恂恂每倚門爲父老子弟陳說古今年艾矣手不停披足不踰闕歲時伏臘不改其度所著

詩文閨月解正統論文論

劉梧字繼美歸善縣學背人倣儻瑰偉與葉天祐謝憲爲  
執志友崇論宏議學者多目笑之自魏校督學嶺南惟  
二三子是崇是信於是忌者譖梧爲狂校曰梧也狂削  
籍梧曰諾退則自號古狂曰吾古之狂也著誕言十六  
卷曰理氣疑心性疑經書疑史傳疑皆儒先所未發攬  
至五羊投詹事黃佐而去佐得之大驚以書招之曰吾  
黨之士如古狂有幾佐不揣留心律厯儻肯遊我盤谷  
當共談也冢宰李默是時僉事粵中爲序誕言曰士當  
以孔孟爲師微文隱義舍是何所折衷劉子著書與予  
同日而語所不協者十纔二三然已奇丈夫矣於是督

府以下皆欲薦梧於朝因忌而止太守李玘旌表其門  
曰逸彥請纂郡乘梧學無常師見必超卓與薛侃辯心  
性十餘書侃不能難嘗自贊曰不朱不陸不湛不王遠  
觀之劉繼美近觀之劉古狂其人如此然犖犖自負高  
自標許故不爲流俗所稱云子確尤精律歷之學黃佐  
嘗令推未來三百年郭守敬歷不協古者猶十餘條確  
自元推至堯甲辰以歷代史較之不協者七耳製渾儀  
精巧都御史張臬吳桂芳咸受法焉城水東計丈數揣  
高低卽士彌牟不過也

謝憲字汝慎歸善下郭人不事藻飾如野鶴孤雲事親孝  
無私財爲邑諸生與葉天祐劉梧同舍合志聖賢之學

諸生不敢雁行歲薦游太學見燕地風塵人皆蒙面名  
爲罩紗憲乃賦詩寄慨曰行值風塵更可嗟羣兒當路  
弄泥沙先生自有垂簾計那得閒錢買罩紗其傲睨皆  
此類也及歸築處處臺居之葛巾木履日攜離騷往來  
西湖北城浩歌至暮而返憲學一稟程朱多自得嘗倚  
臺畔修竹折枝濡赤土註易天祐子春及受而錄之名  
周易竹書其他著述甚富謂之通紀私見潮陽薛侃來  
惠講道豐湖學士多與辨析而獨多憲一日和明道詩  
有云散殊不落無形外飛躍都歸有事中何以不淫何  
以樂人能無欲是英雄其學如此憲卒無子終不令嗣  
子易叔姪之名或下第不豫獨歎曰人不能位天地育

富萬物徒富貴耳名齋以惕學者號爲惕齋先生

翟宗魯字一東博羅竹陣人少補縣博士弟子砥節礪行  
學師聖賢居處必敬動遵古禮嘗設科以誘進多士一  
時學者遵教惟謹時延慶招提峙泮宮東宗魯上書督  
學使者魏校曰泮宮壓於招提據高臨下雨集以學爲  
壑非所以息邪反經崇儒貞教也徒招提登高鎮以其  
地廣學宮便校從之僧赴闕訟使者雜問卒直宗魯當  
是時校講學嶺南檄下邑弟子良者受業宗魯從校居  
之省心亭一日過問省心之義對曰聞省身矣不聞省  
心心一也省心無乃二乎校嘿然其定力卓識皆校居  
也後歐陽鐸來督學檄諸博士行僞而堅言僞而校居

悉以名聞博士徐甲憚宗魯嚴則以應條宗魯於是上書請削籍去鐸疑之廉得其情強起試遂中式時嘉靖辛卯也甲辰署宣平學諭本其教於鄉者行之文士彬彬嚮風嘗著學規上督學孔天允報曰不帥教者先斥後聞其見重如此丙午聘典蜀試故事有幣直指袁公大重宗魯有加賄皆辭不獲買田闢地鑿池築臺皆以文明命之田書負版亦稱翟文明云己酉遷融縣令緩征輸節財用廣學宮復廢學地租每日炳蕭告天而後聽訟片言立剖胥吏受成而已久旱露禱雨乃大澍十二峒獠來寇宗魯率師禦諸郊賊以牛前行忽震死懼而退宗魯遂釋兵詣壘諭以禍福賊頓首請爲編氓其

後兩院以轉饜非宗魯不可中道賊百艘遮迎謀知融  
縣令亦頓首投戈而退於是宗魯擇諸獠子弟稍慧良  
者被之青衿征鼓導歸諸獠以爲寵剽掠用稀二府歎  
曰得一賢令勝百萬師信哉宗魯一介不取與事上盡  
禮至爭論當否則諤諤不撓上官求砥對曰非融產也  
不敢妄應藩司以獻程不及逮簿往宗魯謝無罪罪乃  
在令然賊未誅致斂民田損國賦亦典兵罪耳藩司嘿  
然良久曰君且休矣而御史朱有孚則齟齬之也有孚  
行部至宗魯不候門大怒遂文致其罪明年大計羣吏  
諸司皆署上考其毀不行旣覲竟乞骸骨歸宗魯剛毅  
有守爵祿不入其心少傅翟鑾欲使聯族姓少師徐階

又以父丞宣平欲羅致之皆不往武定侯郭勛諮子師  
於吏部梁津推轂宗魯且可得厚資宗魯謂權臣必敗  
何爲自撲膏火家世素貧甘儉樸妻楊氏亦能安之每  
夙興夫婦登堂相揖諸妾供楨退而治事三尺童子不  
入中門內外肅然壬戌病卒年七十有四融縣宣平皆  
祀名宦鄉賢

葉春芳字應元歸善萬石坊人父標母鄒氏年十九而寡  
遺腹生母茹荼鞠之春芳幼而秀發穎悟稍長聞母稱  
父生平卽灑淚悲泣矢志思報十五游郡庠試輒居首  
督學魏校深嘉之檄有司聘爲社學師凡七應舉弗遇  
選貢游南監時湛甘泉爲祭酒一見甚相得遂學焉日



益淳礪嘉靖壬寅選福建古田丞盡却常例一毫不苟  
院委署旁邑民皆愛戴若父母既署古田縣政務大舉  
建社學行鄉約立保甲禱雨而雨應驅虎而虎除禦盜  
而盜息三載民咸歌頌當道旌之有上官經過訝其疎  
慢者厲聲曰豈不折腰人耶春芳應聲曰兩峰山水當  
不嫌吾疎慢兩峯者考妣卜宅也遂拂衣歸士民遮留  
爲立去思碑歸卽葺永思堂以志孺慕其志浩然不囿  
於俗族人有於其少孤時肆害者置弗較且厚恤其子  
孫曰吾同祖一氣也赴選時有貴顯欲爲書薦者曰素  
不干謁豈今改節耶其自守如此甘泉稱其學問純正  
遣二子師之及卒爲志其墓曰古田治家以嚴自處以

儉訓子以勞型俗以禮待物以謙與人以忠見義舉則  
勇爲遭橫逆則不校暨諸周貧恤孤輕財重義爲衆所  
稱信成本厥孝思云卒年六十三祀郡邑鄉賢子五人  
長夢麟由貢生授如臯主簿爲人純樸嘗率諸弟夢奎  
夢陽夢熊詣南海何端恪門稱先君之命而稟學焉

李鵬舉字起南歸善人父信官江西理問治獄有陰德鵬  
舉幼慧從潮陽薛侃講學於豐湖遂究理窟舉嘉靖丙  
午鄉試兩上春官不第授餘杭教諭能以師道自任嘗  
刻正學編集義訓立勸懲之榜重節義之旌尋以憂去  
起補盱眙令有叔訟其兄子者久不解鵬舉論以倫理  
剴切詳明各感泣去爲肖像而尸祝之遷博士日與諸

生講明心性之學判梧州却督糧歲例八百金署懷集  
令修城葺學覈丁糧清冊籍設木吏以代勾攝立社學  
以教孺獠金鵝山諸獠願輸丁爲氓旣而後令至獠復  
叛父老願復借寇鵬舉再至念獠反覆思創以威乃夜  
犒民兵授方畧翼辰紛然獻馘諸獠自此懾服又署容  
縣縣當孔道郵符肅清遷台州同知署臨海邑多顯仕  
其貴介出入夫馬咸於縣取鵬舉一切裁革稽令甲以  
品爲限催科清丈究極利弊立法莫不可傳而台故有  
海濡腴壤祖制以近倭禁民田而勢家陰踞之鵬舉按  
其事論遣如法時御史龐尙鵬按浙精劾吏治以廉能  
貪酷立標令人自審所處鵬舉處能處酷御史曰台州

府同知不酷其處能是也未幾遷德府長史乞歸日與鄉族子弟講學不倦父原置海田數頃浪壞之鵬舉罄囊築復成田二弟欲之卽分與不吝其孝友如此卒祀鄉賢

周坦號謙齋博羅人仕爲縣令自幼有志聖賢之學從學中離出遊湖湘維揚新泉天真天關以親講席衰老猶與徐魯源相往復其論學語云日之明也必照於物有不照者陰霾之蔽也心之知也必格乎物有不格者物欲之蔽也又曰一陽生於下爲復內陽外陰爲泰於復則曰見天地之心於泰則曰內健而外順是可見學不遺乎外而內者其本也故曰復德之本也惟復則無妄

而剛來主乎內矣此內健之爲泰也又云不可於無喜  
怒哀樂覓無聲無臭只喜怒哀樂中節處便是無聲無  
臭所在又云瞑目靜坐此可暫爲之心體原是活潑流  
行若長習瞑坐拘守空寂則心體日就枯槁非聖人之  
心學也又曰白沙之學以自然爲宗至謂靜中須養出  
端倪吾人要識得靜中心體只是個澄然無事炯然不  
昧而已原無一物可著若謂靜中養出端倪則靜中又  
添出一端倪矣且道體本是自然但自然非意想可得  
心下要自然便不是自然也

葉春及字化甫號綱齋歸善人天祐子也天資高明少以  
古人自期待好讀先秦以上書尤肆力於左傳離騷年

二十一領嘉靖壬子鄉薦六上春官不第隆慶初應詔  
上書二十五篇纒纒三萬餘言切中時務首日崇聖學  
尤爲探本都下翕然謂劉蕡復出卒爲通政某所撓授  
福清教諭非春及志也之官教先孝弟忠信所執持卽  
監司不能奪遷惠安令以文章飭吏治公牘教令無不  
手裁者居耆老於申明亭戶婚之訟使兼聽之毀淫祠  
五百區建社學立保約丁無官私老幼咸登於籍謂無  
事可以行教化有事可以比什伍故其居官令行禁止  
每有條教邑人士寫而讀之期會簿書皆爾雅之文上  
官無不敬重民有訴賦不平弓境內田均之以是忤權  
貴三載引疾乞休和歸去來辭以見志會擢賓州守惠

民詣闕乞留不允而忌者又匿賓州檄令不得赴乞病  
益力竟掛冠歸兩院遂劾以逃大察削籍爲民則入羅  
浮石洞築逃庵以居讀書談道著述不輟若將終焉直  
指龔懋賢造其廬題曰堯舜之民太史趙志臯以忤宰  
執出副粵憲至羅浮物色之深歎其不凡萬曆辛卯太  
常卿穆艾戶科給事王嗣美疏薦遺逸於是起興國知  
州時志臯已在政府思大用之未之官轉同知勛陽一  
年所入爲戶部員外隨轉江西司郎中嘗筦崇文稅其  
事凌襍米鹽動關中貴人春及一切淵魚察之不少假  
也條上利弊甚悉奉旨刊行會遣使日本上疏求遺書  
旨下所部不爲覆擬請覈九邊屯田具疏未上竟以勞

卒卒春及剛方廉介學行表表一時所爲文高古雄偉  
出入左史秦漢其在惠安著政書在崇文著權書皆厝  
注經畫詳察不苟所修肇慶順德永安惠安諸志良史  
才也其論學恪守程朱計偕時過吉州賦詩贄羅文恭  
居旬日舉凡心性知行博約忠恕中和道器天人有無  
鬼神格至敬義慎獨一貫之旨無不辨論念庵學稍異  
竟不北面而去石洞以後所造益深楊起元稱其文如  
春蠶作繭遇物卽成如化甫者代不數人豈獨惠而已  
哉祀郡邑鄉賢

胡世祥字光甫博羅善政人以祖大自常游白沙之門幼  
卽知趨向嘉靖壬子鄉薦遂正其學於羅念庵旣署光



化教諭爲汪道昆所器重尋擢戶部司務丁內艱起補  
刑部改南工部陞戶部員外晉山東司郎中竟爲忌者  
所中歸絕跡城市晚年益進其學好獎掖後輩世祥與  
春及同鄉榜皆嚶嚶道古及歸卜築羅浮邑令鄧以誥  
嘗曰吾兩人羅浮始得胡曙庵一面真今之古人也春  
及時亦罷歸居石洞人稱羅浮二高

李文傑字汝與歸善人未冠爲諸生薄詞章潛究姚江新  
會之學爲多士師性孝友居喪哀毀事兄如父嘗助友  
金不責償督學嘉其文行嘉靖歲貢歷訓諭延平侯官  
遷韶州教授却貧生之餽造士多所成就老而致仕猶  
好學不倦著太極卮言發明濂溪宗旨鄉里有紛難必

曰質正李先生爲人士模楷年七十九以無疾終

陳宣字子爲博羅人篤志力學食餼垂二十年貢有期矣  
不遠數千里走嶺北從羅洪先學頃之超然若有得也  
曰人有不爵而尊者趙孟所貴於我何加焉况親春秋  
高不能盡歡菽水謂人子何以告其父父曰焯毋猶云  
志養豈吾不婦人若耶遂上書去博士籍曲盡子職朝  
夕不離通判吳晉表其閭曰高士父卒廬墓三年人皆  
稱爲孝子其棄博士籍也羅洪先贈之詩曰盡說浮雲  
事業輕何人升斗繫平生聞君已解葫蘆縛莫向漁人  
問姓名

孔學周字憲卿歸善人少補博士弟子以病謝去潛心理

學著太極辨疑多自得結庵羅浮繕性脩道丹經醫術  
咸窺其奧云

車樑字吉仲歸善人少與從兄鳴時鳴鑾並有文譽登萬  
厯癸酉賢書署東莞教諭遷松滋令廉明有威政平訟  
理尤加意作士人文蔚起遷知會昌治猶松滋歸課羣  
從子姪多成立足罕履公門舊廬外未嘗營一舍其高  
雅如此

葉萼字韓夫別號浮谷歸善人時之子也萼髫年補邑校  
生尋食餼試輒冠軍猶以舉業非第一義欲進而求聖  
宗時其父從潮陽薛侃講學於豐山又使萼師之侃講  
易疏魯論及各經釋義萼悉與之訂正嘉隆間峒賊蔓

布諸邑衆五萬列巢十有三所萼慷慨上言宜大剿徒  
撫則賊勢益張乃自具筆札窮訪籍盜名及所焚劫屠  
戮積三載成帙謀諸有識畧者又五閱月乃與郡紳司  
監共圖諸賊慘害狀附以前帙殺青數百本走京師以  
聞並遺李給諫學一學一復疏力主勦自是積寇幾二  
十年始平旣議立郡割縣事學一廷諍得息萼亦甚有  
力焉有巨姓侵縣學地萼爭之十年卒復之萬厯丙子  
以恩貢爲嚴州府教署桐廬多興革條上八議撫臣嘉  
而行之乞歸後築室豐山參議周鼎關天泉書院延萼  
爲一郡師當時碩彥莫不禮廬師事著有合圖易疏詩  
書精釋四書合詮方壺謾述廣莫遊草七子眞宗等書

四舉大賓壽八十卒祀鄉賢

楊傳芳字體晉別號肖齋歸善人性方嚴易直而篤於孝弟父嘗曰傳吾業者此兒因傳授尙書遂通大義及就傳有所稱說同儕下之溫陵蔡克廉督學拔冠惠士自是試輒雋聲藉甚嘗與修郡乘博學多聞爲司理楊載鳴所器重講學里中生徒無慮數百人成就甚衆以歲薦爲潮州訓導纔四十餘日感念先人邱隴卽告歸語子起元曰吾老且休無能報國孺子其勉諸家居不涉公府不治生產有稱某腴田佳園可購以遺子孫者輒曰遺子孫孰如善事母孝母病衣不解帶者累月撫字幼女弟及仲兄遺孤如已出嘗從甘泉遊聞白沙陽明

之學恆以無成爲愧作讀易銘置座右嘗曰聖訓如醫  
方隨病增減不可泥惟執中二字爲固本九著自鑑錄  
又性理五經子史摘要著爲四字七字經行世今不存  
臨歿神明不亂正衣冠就寢而逝祀郡邑鄉賢

按府縣舊志有云採格言爲三字四字經訓諸蒙孫  
而屈翁山廣東新語則云肖齋有性理五經子史摘  
要著爲四字七字經行世今不存其童蒙所誦三字  
經乃宋末區適子所撰適子順德登洲人今依新語  
存參

張萱字孟奇博羅人政熙長子萬曆壬午以春秋魁鄉試  
肄業南雍受知大司成趙志臯推爲諸生都講丁父憂

歸柴立躡踊禪服外猶樂樂如也屢上春官不第考中  
內閣制勅房中書纂修正史侍經筵得發秘閣所藏書  
讀之著秘閣藏書錄四卷時與馮夢正諸名流結社賦  
詩往來莫逆甫一載念母子告歸母強還朝因修玉牒  
稱旨轉北戶部主事署奏曹諸所條上皆爲屬草差權  
游墅關迎母就祿極意寬商諸爲關政蠹者芟剔無毫  
匿值三吳歲饑捐賑關門并諸庠貧士且修董公堤游  
墅先師廟城隍廟虎邱寺灌山廟重建義倉大學士王  
某謨權政碑頌其德陞本部郎中差滿奉母還里乞終  
養擢貴州平越守未任以蜚語中考功令聞之欣然爲  
園榕溪之西不入城市海內稱爲西園公母喪白頭作

孺子泣徒步扶葬弟萃早世撫其子如已出繕父祠塋  
皆獨力經營立仁粟倉以濟族里歲捐數十百鍾每遇  
荒歉煮粥濟饑多所全活野有露齒必捐樁掩之外祖  
謝仁以清白吏祀鄉賢不數傳有欲鬻其先廬者捐金  
贖還復封其墓購負郭田百畝佐魚菽館穀其嚮秀者  
延師誨之郡邑有興革當事必式問諮訪披衷商酌畧  
無私徇篤故舊常立師友二祠春秋致祭臨池真草篆  
隸皆工尤善丹青生平無他嗜獨癖書老而彌篤藏萬  
卷丹鉛無不遍者自天地陰陽以及兵農禮樂元乘韻  
鈐無不探討淹貫所著述已梓行者西園存稿彙雅前  
後編古韻疑耀彙史史餘聞見錄六書故雲笈七籤唐



撫言三朝政要北雅心口語蘇文忠寓惠錄八宅周書  
陰宅四書大惑具體未梓行者西園類林五經一貫古  
文奇字西園類說當道屢疏薦於朝高臥不起年八十  
四無疾端坐而逝順治十三年公舉從祀鄉賢長子元  
炳字伯虎善居繼母喪友愛諸弟弱冠受餼於庠後以  
父春秋高朝夕承歡遂上書去博士籍

張萃字仲蔚博羅人政熙子與兄萱同舉萬厯壬午鄉試  
讀書金陵文譽大噪尤善稱詩工臨池戊戌乙榜教諭  
慶元與諸生刺經考藝日課月程庚子分校貴州辛丑  
又乙榜擢國子監學錄赴任卒文藻行誼爲時所鄉試  
子并祀鄉賢

林可盛字芳松海豐人事繼母友異弟人無間言年二十  
始奮志尚學萬厯辛卯登賢書淡然謝絕勢利惟以一  
經教二子成名嘗捐金倡建尊經閣邑令高其誼記之  
至於贍祀有資營賑罔倦焚券周貧如約以償失券之  
貸皆可謂輕財重義者先卒一夕有星隕屋前人咸惜  
其用之未究學亦不得振焉仲子呈祥登天啓丁卯賢  
書有才名

陳廷諤字忠孺歸善人少博羣書善屬古文辭登萬厯庚  
子賢書事親孝從兄久疴善視之歲饑推粟以分族黨  
耿介自持公門空至逮次子正蒙登第乃銓澄海教諭  
遷衡山令却羨餽革陋規杜賓客拊循疾苦政肅刑清

時默事孔棘督府檄衡運饋廷諤力陳於郡不可復議  
衡山輸折則以去就爭之逾歲卒於官篋中惟書數卷  
而已著有瀛海吟青瓊事紀澹寧集白沙先生虛無辨  
黎化中字彥誠歸善人性孝謹母李病侍藥七載無怠容  
事繼母張尤恪苦心窮經洽聞著行楊文懿素友善棘  
闈十一戰僅歲薦廷試第一唐抑所太史最賞之司訓  
南海義不苟一錢躬率正學分俸助貧生晉徐聞教諭  
以繼母憂去不復仕甘淡泊耄不釋卷友愛兩弟白髮  
如孩其學以仁義忠孝爲本南海朱光伋張應泰等登  
賢書猶踵門執弟子禮蓋服其教也年八十六卒

陳運字子昌歸善人性孝友博學能文少從楊文懿講道

輒得大旨萬厯乙卯舉孝廉授湖廣瀏陽令會桂藩之  
國例征屢夫出迎洞庭時魏璫肆焰中官護送者虐民  
異常運爲卵翼悉脫箠楚邑大司馬胡應台稱其豈弟  
君子禁耗羨止鬪爭民皆息訟樂輸徃狂鞠爲茂草公  
餘進髦士講析書義捐俸修文廟置學田多士頌德母  
艱歸日依椿帷不復仕居親喪哀毀祭葬如禮人稱陳  
氏有子及卒郡守梁旌之私諡惠端生平與人無苟言  
笑而溫和謙抑時以恬靜廉退歸之著有左傳特刪皇  
明文正惠西湖志瀟湘草披雲草行於世

黃冕字瑞甫歸善人年十三穎而文郡試卽有國士之日  
弱冠餼於庠聲名籍籍萬厯庚戌歲薦任高州訓導修

聖廟置學田課士不倦遷瑞昌教諭歸築豐湖庭與其  
兄冕篤友愛訓諸子姪有家學冕五子珣琬璿瑜琿琿  
鄉薦令長壽璿經魁守澧州冕二子玠鄉薦官戶曹珮  
太學生孫元極司鐸大埔餘皆副歲廩生又孫萬鏞捐  
修學廡以孝義重於邑庠門風甚著冕著忠孝錄藏於  
家敦愛敬好施與爲一邑所稱云

曾允升字元陟博羅人九歲孤事祖母與母以孝聞及卒  
葬祭如禮事叔如父工詩文精隸草徵言者常滿戶外  
以明經司訓澄海談道考藝却寒士修脯有諸生蔡耀  
初被誣降力請復之隨舉於鄉己卯省元謝宗鎡亦爲  
所器重至今潮土嘖嘖稱知人遷湘陰教諭歸吟咏不

輟外氏張翁沒無嗣爲經紀其後事甚厚著有山藏編  
考盤草朱明洞草及崇儉勸勤諸論署所居軒曰硯曦  
學者稱硯曦先生卒年八十一

林時潢字天屏海豐人敦恪能文早失恃事父與繼母曲  
盡志養以兄時濟爲嚴師奮一尺稽古天啓丁卯登賢書  
性恬淡絕外嗜登第八年家無絲毫之積臨終歎曰莫  
使滿頂帆常留轉身地言不及私而卒嶺東右轄陳元  
藻輓以詩云欲把清虛還造化依然回去演三車

李樹東字定仲河源人都御史燾之次子也受業歸善楊  
復所之門以道學自任嘗闢新芝社講誦其中無書不  
究以歲貢司訓四會著四書訓義誘進士子尤多崇正

時流寇陳萬屯聚東庄九連山四處劫掠樹東奉諭招  
撫單車詣壘曉以禍福賊悉平世謂文德勝虜劉信夫  
譚經歸善人正統六年舉人授武緣教諭補瑞安衡文南  
畿陞南雄教授年未六十乞歸著六經大學綱領行世  
孫大司馬原以樂道扁旌之祀鄉賢

駱鳴雷字乃震歸善駱斌仲子也穎悟力學明崇禎己卯  
鄉薦薄涉仕籍退而講學於西湖之濱四方負笈者日  
衆龔章陳芳冑皆其高足餘掇巍科列高等者半出其  
門性篤孝操行恂恂而好善樂施賑貧卹難行已無不  
可以告人卒年七十八著有四子尚書解義獨得朱程  
蔡沈微旨學者私謚爲文恭先生

黃淑字勿堂陸豐歲貢任通山學師事湛甘泉張東所嘗  
與王陽明講格物致知之學陽明稱爲湛門第一

附長樂縣

**明**李曰巽字順之長樂人少穎悟博覽羣書雄文麗藻不  
修小節以綠衣構變坐郡獄讀書不輟太守姚良弼見  
其文異之立爲平反越三年以書經魁鄉薦萬曆十一  
年授蒼梧令捐月俸增建學一十四所學置師各一人  
招里落子弟誦習其中遷廣信府同知有醫官雙分巡  
使者數言事多效郡縣吏無不暱嘗以事屬巽巽怒辱  
之泣訴使者頷焉頃以造橋奇羨二百金太守欲分人  
橐中巽不可盡輸幕府太守忿甚日讒巽於使者明年



遷瀋府長史以病免嘗修海豐縣志有舊序

顏璉長樂人父繼善少事李白石講慎獨之學爲人矜持  
一軌於禮性好施嘉靖壬午同弟繼志舉於鄉璉周歲  
孤母孀居課讀年十四試冠多士登辛酉賢書五上公  
車攜家讀書金臺朱鎮庵司寇延教其子維京登進士  
名益重授灌陽教諭日進諸生論周程朱張心學胡督  
學聘主桂林經館如楊際會陳蘊譚汝試李伯華張董  
卿皆其高足後轉興業令政務大體訓農桑禁巫覡建  
社學聽讞公平民懷吏畏以不能折腰解組歸遊羅浮  
霍鰲道服芒鞋與山僧野老爲侶家書二十八載隻字  
不入公門著畫課兒孫爲樂有詩集

大  
少  
凡  
云  
分  
三  
四  
八  
八

惠州府志卷三十五

人物

文苑

唐章昌明循州龍川人家素饒裕勵志讀書工詞賦長慶中進士及第嘗上書宰相李吉甫責以協恭和衷之義并獻所作鼎實賦吉甫稱重之累官校書郎轉秘書丞秘書清華之職自吳郡張率之後東南胄緒未有任者昌明耽閱麟署慣乘鹿車雖苟勗之注寫竹書薛夏之移坐蘭閣莫能過也竟以勤瘁卒於官祀邑鄉賢

按龍川志曰昌明唐進士見記纂淵海舊通志俱作昌明舊郡志云好李涉詩乃昌明之族昌明非家於

循者則又作思明潘志仍之遂謂越井記坂塘書室  
石刻訛作昌明記中書名凡兩見歷傳至今恐未必  
誤石刻乃唐循州刺史楊在堯所題同是唐人尤爲  
可信復證以唐詩紀事一則是循人原別有韋思明  
老而不仕潘志昌明俱改作思明恐考核未精茲仍

舊志

宋朱巖二秀才名不傳歸善人皆自少擅才華文宗韓退  
之不求仕進聲聞每作文賦詩鼓琴爲樂郡人吳高追  
紀以詩云秀出鷺城十萬家二君年少擅才華道宗正  
學推韓子琴遇知音賞伯牙北郭薄田堪釀酒南塘清  
水足烹茶姓存名沒斯真隱留得高風後世誇

梅蟠字子升歸善人元豐八年舉進士第多才博學筆力  
豪放授迪功郎不樂仕進鄉人稱曰梅夫子凡惠之江  
山多所留題詩蓋千篇晚居豐湖號羅浮山人時眉州  
博士唐庚謫居惠常與遊其贈蟠採藥行曰順途行歌  
醉者誰先生採藥山中歸昨日攜籃入山去今日出山  
香滿路先生年來飯黃精俗眼但白髮但青得失乘除  
適相輔勿取讒人畀豺虎

陳仲輔歸善人博學善屬文工隸篆爲世所重嘗作枕屏  
篆五箴文遺侍講陳鵬飛鵬飛以詩答之極其獎賞晚  
以特科授邕管察推鵬飛復贈以詩

附鵬飛贈詩幕下誰人識臬之微聞贊畫向蓮池登

樓不恨鄉關遠挂笏只言山色竒直道自能消鬼魅  
高人何處不軒羲他年坐上話銅狄可是蓬萊清淺

時

陳煥字少微博羅人安貧守道敝衣蔬食處之晏如也接  
物甚謹雖遇童稚無異成人以禮遜化閭里之橫逆者  
鄉人稱之曰陳先生提刑芮煜嘗屏道從造其廬見四  
壁蕭然贈以詩曰原思非病貧何患回也雖貧樂有加  
歲晚與誰同此味梅花深處是君家煥詩清勁傳於世  
者幾百篇其咏梅花云雪裡溪橋獨樹春客來驚起曉  
粧勻試從意外看風味方信留侯似婦人時爭傳誦以  
特科調高要簿秩滿不仕祀鄉賢

明黃希穀龍川善慶厠人永樂舉人任漢陽府通判轉台  
州府行履純篤胸次瀟灑所在有聲工詩畫吳中今猶  
慕之

吳高字志高

一作  
尙志

歸善人宣德八年進士厠官刑部主事

員外郎福建參政好學能文致仕歸杖履幅巾徜徉山  
水惠陽風物陶寫殆盡筆能擺落纖靡文譽稱一時祀  
郡邑鄉賢

李應歸善人南都鄉薦授廣西南甯同知不樂其職歸諸  
生延館於翟夫子舍多所裁成其學專精治書旁通律  
厠

陳文歸善人景泰丙子鄉舉第二授江西永豐教諭三任

教授五典文衡當時美譽芳聲咸推宗匠

鍾雅字大章歸善人成化戊戌進士善屬文尤工於詞時人比之柳耆卿才思敏警與翰林編修涂瑞同鄉薦每卽席賦詩刻燭限韻秦淮海之流亞也祀郡邑鄉賢

盧曰倫字廷敘歸善窰頭人少警敏學於兄曰偉偉宿學有文譽每自以爲弗如阿倫弱冠登嘉靖丁酉賢書而偉亦選貢郡守史立模以雙鳳和鳴表之後攝新建教諭卒自幼善事母母病目倫朝夕泣籲天次子熙溫和簡澹孝謹有父風萬厯癸酉亦舉於鄉仕杞縣教諭乙酉分校山東士未幾亦卒於官

王守充字美中歸善大路人少穎異郡守吳至愛其文



優處經館嘉靖丙午鄉舉庚戌成進士戶部主事知邵武府詩以清麗爲宗書法文待詔爲人質直好獎率後進晚頗談元與孔學周相友善時或笠簑漁釣自稱東湖漁父後溺水卒初卜築百官池題其柱曰萬卷篋中惟五嶽百官池上有三間人以爲識云

韓儔字齊甫博羅人有學行以貢授邵武訓導尋丁繼母憂起補懷安皆精勤造士當道有所論撰多以屬儔嘗撰東宮表文會病甚腹藁不能書臨瞑猶口誦數語而絕諸生徒號哭失聲喪過邵武亦然當病篤時仲子鳴鸞百計求醫割股以進及卒辭賻稱於時

劉楨字美伯歸善南津人穎敏能文與葉龍塘司馬齊名

嘉靖甲子年幾四十始鄉薦主司喜得人署其卷曰釋  
此不錄幾爲碩果不食士林傳之宰沂水不能媚上官  
罷歸爲人瀟灑無芥蒂雅善嘲諷有東方曼倩之風

劉漸造字道充歸善人住郡城之萬石坊隆慶丁卯以春  
秋魁省試與榜首楊起元齊名數上春官不第小築城  
南刻苦下帷文益日富所著有史餘錄學思錄三十卷  
藏家塾年逾七十無疾端坐而逝孫燾博學多聞才名  
藉甚餼於庠會恩詔下學使者以燾應薦拔第一旣貢  
京師合各省士試於廷再試北雍兩列前予大司成奇  
其文特恩前十名皆以知推銓補獨燾以艱歸不得與  
云性孝友恭謹持躬藹然子孫世其家法

林應祥字朝賓郡城西門人天資粹美材學夙成爲文雅  
有矩矱弱冠舉隆慶六年第六人以孝弟稱慨然有力  
行古道之志惜年僅三十

廖朝天字仕獻郡城大街人少亡賴父督之甚嚴閉小閣  
中一榻外四空無著足處兀坐經年心忽開悟由是思  
力沉酣學日益富爲文勃鬱有奇氣隆慶庚午舉於鄉  
卒年三十有七

韓鳴鸞字伯舉博羅人萬厯壬午鄉薦少從伯兄學授以  
帖括讀苦不能竟至左氏先秦兩漢及黃初大厯諸作  
輒心領神會質弱不勝衣口吃不能道而屬文獨有精  
魄與邑人張萱皆以修古鳴當時跌宕文圃凌躡詞場

雖囊空瓶罄弗問也邑大夫鄧以誥謂鷺赤貧而敦尙  
風節韻致清遠不愧今之古人時捐俸錢餉之卒年四  
十一文士咸嗟悼焉

韓晟字寅仲博羅人鳴金長子方嚴易直篤孝友性嗜古  
學墳典稗官罔弗淹貫以萬厯辛卯舉人授浙江遂安  
令著遂安政論凡綱紀節目因革利弊一本經術三年  
上計需次長安獻萬壽賦能以詩諫頌不忘規應詔上  
書纒纒萬言悉民隱談兵事嘉謨讜論喧傳都下解組  
歸隱城東別墅感時寄興往往託之詩歌所著有書雲  
臺稿雁木燕市等稿行世子如璜如囿另有傳

錢萬選字紹行歸善人宋熙寧間惠州守錢酥之後由錢

塘徙焉年十二通春秋弱冠三試第一爲諸生食餼文  
名籍甚郡守延課其子人不敢干以私萬厯癸巳選貢  
歸日與楊文懿講學西湖卒祀鄉賢

姚育秀字紹張歸善人祥之三世孫年十二試第一爲名  
諸生九與鄉試三中副車爲潮州揭揚訓導勤於課士  
尤周恤貧寒學使者以文行兼優薦旋卒所著有方山

集都園稿

黃鼎臣字爾調永安人孝友寬洪研窮古籍萬厯己酉舉  
於鄉崇正戊辰進士任江西新建知縣稱慈惠事理洞  
達一剔從前宿弊凡徵輸鹺法馬政煥然改觀兩臺交  
薦爲赴父難死士論惜之而文思如湧泉下筆萬言立

就不加點竄膾炙藝林時推永邑開山手祀鄉賢

劉錡字燮明河源人萬厯壬子舉於鄉潛修篤志凡經史傳注過目成誦下筆成文有崇巖峭壁之致性尤孝終身不仕以全色養

盧瑀歸善人信威仲子少執父喪與兄瑛皆以孝稱母教之甚嚴母恚怒則跪而受荆奮志下帷工古文詞中天啓辛酉魁榜著有自知草雁字詩集韓宗伯奇其文至擬之唐宋大家再試南宮不第以弟瑗早世兄又卒於官奉母不仕分腴田與瑗之子友愛弗替子元瀾己卯舉於鄉亦能世其家學

庠樓字木叔歸善人倣儻奇偉與仲兄梅同補諸生并有

文譽讀書十行俱下聲如洪鐘同輩咸震攝自經史外  
旁及諸子百家裨官野乘無不淹貫落筆灑灑千言邑  
令陸自嶽王孫蕙皆三吳名進士奇其文重期許之隆  
武僞科乙酉舉於鄉不獲見用生徒半郡城遠近來學  
多所成就著有敦行堂集十四卷西湖志五卷行世子  
煥學春秋丁酉乙榜文亦有名

國朝龔章字惕特號含五歸善人其先爲漢兩龔後洪武  
間以軍功隸惠州遂世居焉父克孝有隱德所稱西樵  
先生者也章生而穎異目下十行十二爲諸生號聖童  
順治庚子年二十四舉鄉試第一康熙癸丑捷南宮首  
列館選在館不事干謁日讀書自娛以外艱歸乙丑服

闕丁卯典試江南所拔皆知名士未幾旋里杜門著述  
好獎掖寒素一弟一妹弟早卒撫弟之子成立妹適人  
割已田以給饘粥里閭有急傾囊持贈無德色平生多  
所撰述已板行者爲晦齋集綱鑑捷錄

沈龍震字鷗亭陸豐人順治丁酉舉人授山西夏邑令性  
好學公餘之暇手不釋卷喜接引後進多所陶成著有  
南安治譜讀書符立身符分國左傳二十一史纂諸書  
林鳳岡字桐叔永安人好學不倦長於詩古文詞康熙間  
宦遊粵西歸遷東莞茶園著有石嶽寄詩文集二卷行  
世文奇古詩沉鬱冲澹世罕知之者

葉適字願吾歸善人太保元孫博學能文長於詩工書法



少與從叔自發齊名讀書西湖嘗與四方知名士泛湖吟咏鬪捷騷壇以爲樂因自號西村郡士夫無不知有西村先生者嘗集國朝詩采價重雜林康熙乙卯自發舉於鄉授中書旋致仕而適登壬午榜樂就教職任海陽諭一時有經師人師之目著有韓江小草詩

林遇春字又常連平人康熙壬午舉人初授南海教諭雍正癸卯奉調粵西同考認真分校所薦取皆名下士如陳文恭公宏謀其首選也旋升瓊州教授生平學極淹博爲文不起草日就十餘藝云

余聖言字介侯陸豐人雍正甲辰進士授宗人府主事充玉牒館纂修尋以親老告養歸掌教韓山書院多所成

就工吟詠所著有眺遠樓詩集行世

彭上拔字東樵陸豐人雍正乙巳歲貢任會同訓導秉鐸稱職尋以老乞休所著有鷹頂山房集祇今集漫興編海外編格言編等書行世

謝維植博羅舉人學極淹博嘗著羅浮賸語一卷分山川風俗事蹟品物四種凡邑志所未載者無不精詳考覈搜討靡遺李鐵橋太守亟稱之

劉統基字未山歸善人乾隆丙午舉人博學能文爲諸生時僑寓羊城遂在羊城課徒四方慕其學從游者歲以數百計選授陽江訓導卒於官著有南石山房經義四卷詩鈔二卷四書隅見一卷行於世

練恕字伯穎太學生連平州人知府廷璜子生而孝友聰穎絕人九歲博通經史工詩古文詞下筆千言立就神童之目大噪於時白閣學鎔李宮保星沅咸稱異之惜不永其年十八病歿所著有多識錄二卷行於世

黃煇字初陵歸善人國楹子少機穎嗜學於書無所不窺壯歲嘗入京師游太學司成試其文置高等名譽大噪旣南歸杜門撰述倡爲詩古文詞於聲韻之學尤邃爲人磊落負才好論天下事敢於自任欽州馮魚山敏昌嘗稱爲天下奇士詩尤爲魚山所賞晚年與方外品安結社獅子林賦牡丹花詩和者甚衆卒年八十餘著有叢珠堂集維揚懷古詩一冊行於世

殷師尹字耕野博羅歲貢生居郡城拔貢峻昇子少孤家  
貧苦學博極羣書而於史學尤邃工詩古文詞卓然自  
名其家居平留心時務有所感輒發之於詩慷慨悲歌  
嘗有不可一世之概既阨窮不遇晚年好結方外交往  
來西湖諸蘭若中累月不返返則仍杜門著述簞瓢不  
給泊如也卒年七十有八著有願學齋文集二卷詩集  
四卷

顏棠字蘭舫連平拔貢生少聰敏讀書十行俱下弱冠卽  
知名計偕至京流寓都門日與名流相唱和學益進而  
聲譽亦益起既不遇南歸閉戶著書自適其適日手一  
編雖老不懈卒年七十有奇所著有聞木樨山房詩集

朱栢廬治家格言排律

王居正字京林歸善人優貢生性強記經史過目不忘以故得淹博稱生平行已謙和連不得志於有司遂怡情詩酒著有北游草輟耕錄

張景愈字塘山永安人拔貢生先世多藏書景愈日手一編披閱殆徧以故學日益博性豪爽無城府所爲詩直抒胸臆論者謂逼肖其人云

韓榮光字祥河一字珠船博羅人諸生益令次子也生而穎異讀書過目成誦未十齡卽能吟咏時與諸名流相倡和老宿深器重之弱冠選拔貢京師以七品小京官歸吏部行走中戊子順天舉人洊陞郎中轉監察御史

刑科給事中任銓曹十餘年不事干謁潘芝軒相國嘗  
語其子曰韓君品高學粹汝曹當效之居諫垣二載多  
所陳奏如惠州之盜骸勒贖肇慶之改建稅廠凡有關  
民膜者悉以入告粵民賴之年四十乞假歸省遂高臥  
不出主講登峯龍溪兩書院皆十餘年多所成就生平  
恬淡寡營惟以詩書畫自娛悅負三絕名人得寸楮珍  
如拱璧卒年六十八所著有黃花初二集若干卷行世  
長子師文字襄琴出嗣其兄已酉拔貢辛酉舉人有學  
行六子鑫文卽用訓導亦工畫

陳青槐字銘三歸善人增貢生光祿寺署正銜生而穎異  
博學多聞所爲詩古文詞雄直浩瀚淹有大蘇風格居

平與人言上下古今口如懸河滔滔不竭至稱揚節烈  
輒淚隨聲下悽愴動人其天性篤摯有如此夙負壯志  
屢黜於有司出而襄治江右以母老歸所得贈金悉散  
與宗族之貧者鄉隣有爭訟每得一言立解同治壬申  
與修郡誌未終事遂卒年六十三著有羅浮紀游有聲  
樹齋詩文集





附興甯縣

宋陳南一興甯人少力學家城中因築舍莘莊藏修其間  
嘉熙中擢進士第官翰林宣教著述多殘失子采亦膺  
鄉舉官學正孫惟賢元泰定間舉人官教諭



惠州府志卷三十六

人物

忠義

宋易青歸善人爲都督行府摧鋒軍效用初廣賊曾袞受招復叛紹興六年十月經畧使連南夫與摧鋒軍統制韓京會於惠州督兵討之京募敢死士七十三人夜劫袞營青在行中爲所執賊驅至後軍趙續砦外謂續曰汝大軍爲我所擒者甚眾青大呼曰勿聽所執者我耳賊又言吾不汝殺第令經畧持黃榜來招安青又呼曰勿聽任賊殺我我惟以一死報國賊怒焚之青死罵不絕口青無妻子事聞特贈保義郎閣門祗候官爲薦祭

焉祀郡邑鄉賢

鄭復翁海豐人甲子老漁也膽識過人嘗在外洋值風濤大作同舟者幾無人色復翁獨放歌自得景炎元年帝奔甲子門元兵追至復翁椎牛誓眾率義旅襲奪元軍數十舟王師得援任爲先鋒扈從匡門遭風溺海死

**明**劉簡字以中歸善人居郡之北城永樂戊子舉人爲交

趾諒江州判時交人初附寇逆屢起簡宣布朝廷威德百度修舉洪熙元年寇葉黎利叛攻劫郡邑簡集眾固守數月援兵不至城遂陷簡被執不屈死弟及妻子凡七人皆赴井死焉後諒江民建祠井前祀之嘉靖中祀鄉賢祠後以配王度於表忠祠

謝廉字子清河源人永樂中以監生任交陞芙蓉令剛正  
自持時縣治草創境內盜賊蠭起廉提兵抵穴盡獲而  
俘之賞賚必馳於下以母憂去後除江西樂安縣催科  
不擾民甚愛之滿考請老家居後交陞叛諸臣駭竄廉  
適鋤圃聞之厲聲曰使廉在彼便當以身殉國何偷生  
爲不覺揮鋤中拇流血其忠憤如此祀邑鄉賢

陳容字子昂永安下石人慷慨好義里有紛爭皆就平於  
容容徐而息之退而油然不自德也積而能散待容而  
舉火者數百家環容而居者歲歉不病饑嘉靖初大征  
桃子園當事者物色容悉以兵事委之人人樂爲之用  
遂平劇寇幕府上其功未幾卒同知莫相曾與同事重

容氣義悼惜之爲文祭焉

陳大禮永安柏埔人嘗爲布政司掾嘉靖間賊起棄歸築壘積粟散家財訓練什伍扞保鄉里賊戒毋犯老陳神江一路多保全者兵備道檄大禮帥鄉兵同千戶湯勳討曾廷鳳戰於黃沙官兵却大禮奮罵曰公等無鄉里妻子之念欺朝廷空糜廩食全軀固當大禮敢愛生損威辱國力戰死之督府賜金祭葬立祠苦竹派

徐春芳和平仁義圖人幼有至性情其祖父爲賊所殺誓不共戴漸長益習技擊嘉靖中會官興兵擊賊春芳謂友人曰吾行矣其友止之曰子娶暮始有女盍待生男乎春芳指日曰吾視此如歲且吾不能料吾躬敢卜吾

後遂仗劍詣軍前爭先赴敵死焉先是其妻曾氏送之門曰去矣勉之子死吾卽相從於地下比報至自收簪珥遺其姑抱女一慟而絕

葉尙栢歸善永平人冠帶生員好禮尙義嘉靖辛酉歲饑出粟賑貸後共推爲約長慨然任之值山寇流劫鄉聚又大兵經過濱河居民莫有甯止尙栢率眾捍衛甚有方畧永平賴以安全鄉里頌德

姚柯在大順皆歸善大學生也柯好兵法善禽遁之術大順則習於地里險夷隆慶間守道顧養謙提兵入諸巢二人實從多所勛助後皆以功錄用柯得溧陽丞大順得遼東後衛經歷

姜夢星海豐諸生有氣義知方畧家碣石馬路與鹽墩圍子落米小屯四村相鄰寇掠四村夢星率勇驅殺甚夥寇由是不敢近後與歲貢生葉宗德詣關訴請誅寇及大征領鄉兵自當一隊功最多

按舊志葉春秀張邦聘姚柯任大順姜夢星五人皆附載於薛玉事畧內謂此五人者皆以氣畧義勇衛桑梓其人或跡弛不拘要未可少故聯綴以附忠節之後而薛玉與甯人則僅載其正統間賑饑奉勅旌爲義民一事殊屬不倫今謹各爲標出而薛玉另誌善行類中

羅大魁海豐諸生其父爲賊所害大魁嘗切齒萬曆癸酉



大征大魁請以身嘗賊伏兵邀擊督府義而許之賊果  
墜計中大魁沒於陣妻李氏載列女傳

張燦歸善人都司張燦次子生而驍勇有父風萬厯間嘗  
領兵征鍾陳巨寇生擒斬級共二百餘至黃牛渡孤軍  
遇伏賊力戰陣亡人以爲不愧將種云

許聖綸長甯大席人有膂力嫻武藝萬厯末山寇披猖綸  
年二十二奉檄練鄉兵搗滅箬子斜賊數百軍門嘉其  
義勇授軍前千戶長隨征多戰功賊畏之天啟間會剿  
翁源巨寇綸爲前驅直破李坑巢手刃三十餘級所向  
無前以孤軍深入被創血戰出越三日而殞兄聖經亦  
有技勇軍門檄繼統兵勦平餘寇尋征九連與賊戰於

內莞身受鎗傷抵家七日歿鄉人立廟同祀之

任宗武字元勳其先灤河人父道遠襲祖千戶職斬倭寇  
征河源長吉中心等塞有功陞惠州衛指揮僉事留歸  
善遂家焉繼征岑崗賊掃其巢擢四川都司鎮建昌衛  
卒宗武襲父職卽領兵出碣石擒倭寇蔡雞五吃上臺  
有戎事可託之薦署碣石衛三十餘年威名甚著崇正  
四年河源巨寇猖獗宗武督兵冒矢石連戰皆捷渠魁  
幾就擒忽爲謀者所誤反陷賊伏中單騎衝突連斬數  
級竟歿於陣宗武生平孝友俸入悉散族黨族人聞訃  
皆失聲數日得其尸顏色如生子其壻襲世職加陞都  
指揮僉事賢能繼之

劉全昌永安生員性慷慨有智畧崇禎四年賊鍾凌秀率數千眾圍城知縣黃鳳閣偵知內應三十八人語全昌以計擒之凌秀知事洩驚遁鳳閣以聞上憲有擒賊安城之獎未幾鳳閣調任賊黨親串誣以枉殺良民鎖押解府全昌曰吾以青衿爲一城生靈受辱義應爾遂吞金死民皆冤之

韓晏博羅人崇禎元年恩貢選授福建長汀佐擢江西興安令升浙江衢州同知歷有善政遇變殉難所著有經釋昌言行於世

鍾丁先字後覺永安人少穎異有神童之目崇禎壬午以第一人舉於鄉北上會試遇流寇不果行甲申李自成

陷京師丁先聞之卽痛哭隨傾家起義招集民勇數千屯凹下山欲爲恢復計時永明王都肇慶授丁先監軍道後永明奔粵西號令不及丁先知勢不可爲遂散兵削髮於藍塘之彼岸菴爲僧未幾郡縣及平靖二藩以書來招丁先堅不出所答書風霜滿紙忠義愾然在彼岸著有四書明微全集尋卒

韓如璜字姬命博羅人遂安令晟之子也少負才望中天啟甲子舉人嘗遊寓秣陵與諸名流吳次尾倪漪亭輩主盟壇坫聲噪作者之林順治四年與東莞張家玉結鄉兵復東莞籍前尙書李覺斯等貲以犒士奉表永明王授兵部主事弟如炎亦自惠州來會無何兵敗家玉

走西鄉如璜戰死生平著作甚富有文茲集築筆集姬  
命集韓文刪若干卷 國朝賜諡烈愍祀忠孝祠

韓如炎字閏季博羅人如璜弟也崇正壬午舉於鄉瑰奇  
磊落有經世志甲申聞變痛哭曰國家養士三百年一  
旦地裂天崩而不思所以扶植綱常毋乃爲士林羞遂  
糾合同志百有餘人爲恢復計與羅賓王共草倡義勤  
王揭聞東莞張家玉起兵攻東莞率黃牛徑千人從之  
遂復東莞未幾戰敗家屬死者二十人如炎隨家玉走  
西鄉得大豪陳文豹之眾襲東莞又敗走鐵岡道得眾  
數千取龍門博羅連平長甯遂攻惠州克歸善還駐博  
羅 大兵環攻二十日穴地實火藥火發城陷如炎與

遊擊譚立志守備方如璇千戶侯祖生員韓二見皆戰  
死初如炎知城將陷志在必死遂作絕命辭云丈夫肯  
向死前休今古興亡不自由半壁東南成墜甑一家骨  
肉總填溝天荒地老孤身在國破家亡雙淚流太祖高  
皇今在上小臣一死復何求一門節義自天成同日捐  
軀殉大明赤膽忠臣魂冉冉青閨烈婦血熒熒絕無巡  
遠悲兒女賴有夷齊作弟兄可是阿元能罵賊天津橋  
畔舌縱橫永明王贈如炎郎中 國朝賜諡列愍祀忠

孝祠

國朝黃蔭豫永安生員豪俠好義順治四年山賊萬眾圍  
城城垂陷縣令沈時密謂蔭豫曰事急矣吾子可偽投

賊處偵賊乎廕豫欣然請行挺身投賊賊果三處挖城  
內無覺者廕豫乃射書入城有詩二句云欲知城外真  
消息須悟東南一片空令知之急築子城備之比城崩  
子城巍然賊疑廕豫遂加害焉

李啟佐字立寰歸善人居高圍順治六年寇李萬盈遣其  
黨四出索供羊酒比至高圍誅求無藝啟佐憤而立幾  
之萬盈率眾來報復啟佐激勵鄉人堅守閤一月而攻  
益急勢垂陷眾皆歎泣啟佐曰吾知所以救此鄉矣毅  
然出語賊曰殺汝黨者我也於吾鄉何尤吾豈畏死者  
汝殺則殺耳語畢遂被害賊亦釋憾解圍去

黃易字子參號蒼潭海豐人弱冠登賢書順治己亥成進

士令閩之歸化廉介多惠政邑有藩商重利賧民没人  
妻女易廉而置之法諸豪歛迹康熙十三年甲寅三山  
變起易修隍柵爲守禦計既而不支遂微服間道乞援  
於贛已復走告粵丙辰粵變更酷易棄家復奔贛入閩  
竟以孤憤勞瘁卒於三山旅舍事 聞詔曰黃易兩遭  
逆變不甘從逆越境奔逃忠貞深爲可嘉著從優議叙  
特贈福建按察司僉事遣祭葬廕一子入監讀書祀鄉  
賢

黃一綬字興爵歸善人事母孝攻舉業旣而投筆從戎康  
熙三十五年花山寇亂率兵往勦深入賊穴身受重創  
猶血戰洵出萬死於一生者寇平以功擢宣武將軍未



授命而終

李常茂字景茂博羅人提標外委隨惠州協營將征苗有功題補把總於乾隆元年六月陣亡 賜祭葬賞卹入祀忠烈祠

俞振耀陸豐人由行伍官至都司乾隆五十二年從征臺灣勇敢當先戰功最著尋擊賊鎮南關歿於陣初大府上振耀功擢虎門遊擊 命未下而歿事聞卹廕如典

劉光時博羅人讀書有氣概爲邑諸生遇事敢爲不畏強禦嘉慶七年土賊陳爛屐四恣擾光時團練鄉勇爲固守計賊攻之急光時出戰死焉同時邑諸生朱錫光亦爲賊所脅不屈服毒死俱奉 旨入祀節義祠

羅定貴歸善人南雄協標把總嘉慶三年隨征蜀匪陣亡  
八年入祀昭忠祠

廖賢保字康僭博羅陂頭圍人性敦厚知大義嘉慶七年  
土寇陳爛屐四攻陷陂頭賢保知不免具藥一釜聚其  
家四十八人告之曰汝輩生長我家豈宜辱於賊男女  
聞命皆仰藥死賢保乃死及事平距賢保死已八十餘  
日矣諸尸皆腐獨賢保軀不壞面如生大吏上其狀奉  
旨祀忠義祠同時又有生員朱某與妻某氏俱不屈  
死儒士鄒某爲賊殺妻趙氏聞難遂經死陳寇難作鄉  
人死者甚眾而從容就義莫如廖氏一門當是時惟賢  
保之弟外出獲免人以爲天相之以延節義之祀云

杜仁溥捐從九銜張景仰捐千總銜皆永安人嘉應七年  
永安賊起天字嶂溥仰率勇隨官軍擊敗賊眾解永安  
圍復奉檄往撫羣賊連降八寨比至鐵籠嶂賊首溫亞  
利拒不奉命遂遇害皆卹廕如典祀昭忠祠

徐泰來龍川人由行伍升署左翼鎮標守備嘉慶丁巳奉  
派出洋巡哨遇海賊率弁兵追之至老萬山下颶風大  
作船覆溺同時死者四十餘人事聞照陣亡例賜卹

伍雲中字正衢歸善人由行伍拔補惠協把總調平山汎  
繼調水東陂皆以能緝捕聞時惠屬多盜歸善尤甚上  
憲患之檄潮守吳均來惠督辦廉知雲中能委任永安  
捕不遺餘力賊幾盡計在惠所辦一千二百有奇溫亞

弋獲爲多吳均上其功得陞石龍千總東莞司馬鄉尹  
姓強族也荼毒遠近官兵往緝輒拒捕上憲怒命副將  
許保瑞督師往檄雲中爲前驅而歸善令海廷琛隨營  
襄辦遂於咸豐三年九月進剿詎賊設陷阱敗走官軍  
乘勝采入賊窟至四面圍繞部曲多死傷雲中左衝右  
突所向輒披靡遇廷琛受傷仆地力救援廷琛得出雲  
中竟遇害時年四十有二事聞 賜雲騎尉世襲

陳國輝字虛谷歸善人夙負膽略投筆從戎積功洊升游  
擊 賞戴孔雀翎咸豐甲寅奉檄援廣州駐師小北時

賊眾數十萬壁壘相望纍纍如蟻聚軍中驚顧錯愕國  
輝神色自若每出戰身爲士卒先勇敢直前迭獲勝仗

數月擊退羣賊解廣州圍以功擢叅將明年隨提督崑  
壽旋惠勦賊會江水暴漲督舟師連破西江三十餘巢  
賊敗竄藍塘負險不出國輝率精銳直搗其穴以深入  
無援被執罵賊遂遇害年四十有七而同被害者爲從  
弟國勲邑諸生事 聞皆卹廕如典祀昭忠祠

陳安泰陸豐人由行伍官至碣石守備咸豐四年勦海豐  
賊 賞戴藍翎六年調往江南克勾容鎮江等處洊升  
遊擊九年攻六合紅山窰賊壘殲於陣卹廕如典

楊光泰字懷祥歸善人居平山捐職從九素行方嚴人有  
語及不義者必面正其失不少貸咸豐甲寅之亂團結  
鄉民自衛九月寇許李先等攻平山光泰率勇禦於河

力戰移時救援不至遂敗死之年五十有四祀昭忠祠  
陳壽期字鏡秋博羅諸生世居龍華鄉副貢孔照子也少  
負節概有智略咸豐甲寅之亂連結鄉民以忠義相砥  
礪防守嚴密賊無敢至其鄉者十一月朔博羅失陷壽  
期出家賞募鄉勇數千人赴城擊賊水西响水各鄉皆  
從之與賊大戰於西門外初九日乘勝直薄城下賊礮  
轟至遂遇害事 聞卹廕如典祀昭忠祠

韓夢琦字錦堂博羅人訓導文秀子也文秀品學端粹有  
士君子之稱夢琦承其家訓少以古賢自礪一言一行  
不敢苟由舉人充宗室教習咸豐五年任貴州安平令  
甫下車卽捐廉俸修復城邑增置膏火是時安平穀賤

農人大困夢琦征收國課裁減一切冗費民咸便之七年調普定會狃匪亂作夢琦防守得宜境內安謐升丹江通判未任八年調修文時修文鄰邑皆陷於賊有勸之勿往者夢琦曰此上司之命卽君命也焉可逃毅然赴任略無懼色十年五月賊大至夢琦率勇出擊以眾寡不敵退守待援城中人見賊攻益急僉請出遊夢琦厲聲斥之眾皆感泣無敢私逃者閱數日城陷被執遂不屈遇害妾某氏子慶年慶平僕某合門殉難凡七人長子昌晉邑武生在籍防守咸豐甲寅城陷遇害事聞追贈夢琦道銜父子卹廕如典祀昭忠祠

陳以莊字敬軒和平人太學生與林姓世居水西皆爲巨

族莊性謹厚不吝出貲以成義舉鄉閭咸重其德咸豐  
甲寅之亂練勇守禦七年郡守海廷琛勦龍川賊駐兵  
巖下莊奉命襄助拏解巨賊迭著勞績初賊之未亂也  
陳林二姓爲自衛計陳築土堡三林築土堡二相爲犄  
角九年石逆竄和平三月十八日先攻莊堡莊子弟人  
人奮怒礮斃逆賊無算是夜復四面圍攻十九日堡遂  
陷莊遇害餘四堡亦相繼陷計殉難者一千四百有奇  
其勇烈最著者爲武生陳連章林衍章林衍煊林慶鏗  
民人陳時英陳時沛陳大常陳啟拔劉東陞尤來祥楊  
亞嫚皆執戈力戰死其從容就義者爲諸生陳大猷林  
衍堂儒士陳大受皆先墜樓死其被執不屈者爲廩生



林衍齡諸生林濟馨林衍常林衍卿林衍暢陳大亨巡  
檢林熙桂從九陳洪珍監生陳時憲儒士林世恩皆怒  
罵賊死其以子殉母者爲民人陳大謙幼童陳沛興陳  
建賢建賢時年十六見其母被執操刃赴救爲賊戕死  
大謙爲熊氏子而沛興則熊之孫也沛興時年十三熊  
氏被執二人泣從弗去亦爲賊戕死同治八年御史黃  
槐森彙請 旌表得 旨分別卹廕准建昭忠祠

卓崗連平州人州同銜性慷慨知大義傾金結客聲望大  
著於時道光三十年隨州守吳昌壽禦賊黃毛五於連  
翁橋賊不敢越州境以安咸豐九年髮逆石達開攻連  
平崗聞警親率鄉兵赴援與賊大戰以身受重傷歿於

陣次子翼垣鹽知事狀貌雄偉有膽略隨父同日戰死  
事 聞父子均照例卹廕

李冠芳字希閣歸善諸生有膽略翟火姑之亂冠芳奉郡  
守命偕博羅佾生張冠濤詣馬鞍賊營說賊殲其魁以  
降事洩遂同遇害時咸豐五年也與冠濤均祀昭忠祠  
鄧煥琛龍川諸生咸豐五年土寇倡亂煥琛團練鄉兵擊  
賊於黃石戰敗死之

葉榮海豐人太學生咸豐六年督率鄉勇禦賊於南嶺戰  
敗死之照例卹廕

盧及鋒龍川諸生咸豐八年髮逆擾龍川及鋒率勇防守  
被擒不屈遂遇害

劉飛鳳連平人恩貢生成豐九年石髮攻連平率鄉勇守  
禦戰敗死之

顏瑩組連平人生平疎財重義有落落丈夫氣以捐納授  
山西平陽通判咸豐二年賊攻平陽官民逃散家人泣  
請避瑩組曰吾爲國家吏不能保全孤城尙敢逃死  
乎汝等欲去則去無害也比城陷遂殉難死奉旨追  
贈道銜卹廕如典祀昭忠祠

黃而姚連平人捐納巡檢分發江西咸豐三年奉檄往萬  
安遇賊被執不屈死之事聞卹廕如典

練怡字仲理連平人捐納通判加提舉銜分發江蘇辦理  
蘇州團防咸豐十年蘇州被困怡語其妻汪氏曰死固

吾分汝輩盍自爲計汪慨然曰君死吾何生爲比城陷  
怡自經死汪率妾張氏申氏子戊生富生皆投井死舉  
家無受辱者事 聞追贈道銜照例卹廕

何鍾文字稻村連平人絹納典史咸豐七年署福建將樂  
典史以防禦功洊升通判 賞戴藍翎十一年克復汀

州升同知尋調浙江勦新昌賊歿於陣追贈道銜照例  
卹廕

王振聲字壽臣歸善人把總鴻禧子生五歲而鴻禧巡海  
溺死母袁守節撫之長咸豐初由行伍從征江南積功  
擢補廣西撫標遊擊 賞戴孔雀翎仍留軍營十年升  
副將調往浙江次年新城臨安分水富陽桐廬淪陷振

聲率快騎一日夜馳五百里擊之次第收復賊旋圍海甯振聲率兵赴援海甯圍解遂駐軍守之奉 旨以總兵簡用既而髮逆李秀成率眾犯杭州官軍屢戰失利振聲奉檄馳救百姓遮道泣留曰此城若不得公早爲賊窟公去其如百姓何振聲慰勉之乃行比抵杭州賊勢益張振聲從望江門外夜薄賊壘賊猝不及備遂奪其壘九越日賊悉銳來攻振聲身自鏖戰擊斃無算旋以礮傷左足歿於陣事 聞贈提督卹廕如典祀昭忠

祠

謝汝恭連平人武生輕財重義素以任俠聞道光三十年英清賊黃毛五等擾亂汝恭隨州守吳昌壽禦之於連

翁橋擊退賊眾數萬叙功擢千總 賞戴藍翎時承平  
日久人鮮知兵法汝恭團練鄉民守禦有法學使許乃釗  
采其章程編入鄉守輯要復飭各州縣仿行咸豐三年  
髮逆竄連平汝恭率勇禦之戰歿於巖頭凹而同時戰  
歿者爲例貢生謝君蘭從九銜謝玉良皆卹廕如典祀  
昭忠祠

高家義士博羅白社鄉農所居去城十餘里素習拳勇而  
謹樸自守鄉里皆重之咸豐甲寅十一月朔賊首翟火  
姑率黨萬餘攻博羅道由白社高家三十二人獨扼其  
衝力戰移時斬馘無算賊且退俄附郭九鄉內應於賊  
四面圍攻賊勢復振高家皆遇害免難者僅四人其死

事知名者曰雲亮曰雲元曰雲琛曰雲麟曰乙秀曰謝  
安曰李應皆祀昭忠祠

外  
三  
八  
本



附興甯長樂縣

明張微興甯縣學生素剛勇天順辛巳邑中賊起勢張甚微請自效從都指揮張通至程鄉遇寇挺身與戰賊其魁斬首數級日晚賊敗稍退微進搗巢穴奮不顧身遇伏被執不屈死時與微同死事者有羅澄

羅澄興甯里長也始知縣舒韶出禦賊澄從行敗績賊逐之急眾皆散盡澄亦騎而逸既遠矣乃聞韶墜馬落後曰吾自逸而棄父母於死可乎飛騎還翼韶上馬去自步奔殿被執極口罵賊賊解其體而焚之

賴福興長樂清化都人武藝絕羣天順六年秋賊首羅劉甯等陷興甯乘勢攻長樂不克而退明年春攻程鄉三

司率軍進剿福興從師至蛇坑賊逆戰福興挺身陷陣  
斬級百餘直搗巢穴又明年土寇楊輝猖獗福興隨軍  
又當其鋒殲渠魁斬獲數十上憲屢加賞勞年七十四  
終

巫子秀興甯人勇力絕人宏治癸亥賊胡蔭彭錦煽亂子  
秀獨能畫策衛鄉賊不敢犯又設奇馘賊百五十人獻  
之官復請兵盡滅其屬賊憾之一夕圍其家執子秀夫  
婦殺婦脅使跪秀厲聲罵曰死卽死肯爲逆狗屈耶賊  
遂裂其屍

王天與字性之興甯人正德甲戌進士授江西甯都郡知  
縣行廉政平鋤強植善卓有異績丁丑從都御史王守

仁征橫水桶岡洲頭諸寨屢有功陞俸二級己卯宸濠  
之變守仁徵諸郡邑兵討之天與率兵從焉軍中冒暑  
疾作歿於南昌守仁哭之哀解衣爲歛甯都人肖像祠  
祀焉明年論平賊功有詔給賞仍優恤其家

舊志引祝允明顯忠亭記天與南昌之歿死王事也  
遂以冒暑疾作句爲疑然以行軍勞瘁死卹忠之典  
固在

羅仲虺興甯大學生渭之子也性剛勇正德己巳流賊陷  
邑里眾莫敢敵仲虺奮激率鄉壯往禦戰於白砂坑援  
絕被殺賊退其妻 氏覓尸歸葬之鄉人皆感悼知縣  
智祐義其勇親弔酌焉

何筭興甯人自少膂力過人力田樂善年八十餘被恩詔  
賜冠帶體尙強勁正德間流賊突至其鄉居人望風遁  
筭帥子弟與賊鏖戰手殺多賊力竭死

祝允明曰恒病興甯俗好勇輕死如徵澄子秀仲虺  
筭若而人烏患其多也哉余列五人者其有感也嗚  
呼何必讀書然後爲學

顏容端長樂人嘉靖二年癸未進士歷任南安合安吉州  
守七載不攜家屬善以擊搏豪強擢戶部員外郎精察  
不避權貴陞雲南僉事時交阯作亂端提兵往討斬俘  
平之連破雲夢水井諸寨寇十餘巢皆能出入生死十  
三道會疏薦軍功爲天下第一惜竟卒於官

葉春秀張邦聘皆長樂諸生也嘉靖三十四年春秀首議  
增設縣治迨隆慶六年大征山寇生擒賊首曹志良而  
功不見錄邦聘痛父陣亡誓必報亦以是年大征領兵  
擒賊首卓子旺旋奉守道顧養謙令伏兵永安城下擒  
斬會仕龍誘降葉景清鍾希相因以別兵覆其巢是二  
人者有功不賞竟無成鄉人惜之

李槐長樂人隆慶間亂槐練勇數百衛其鄉居賊屠長樂  
凡七十九鄉竟不敢犯後從副使王化擊蘇繼春於泉  
沙埔孤軍深入救援不至賊圍之數重槐持短兵刺殺  
數賊身被重創死

李尙榮長樂人萬厯間三科武舉授守備署指揮僉事少

讀儒書性剛勇善騎射嘗擒劇賊誅羅大遂萬厯末年  
瓊黎作亂統壯士從征多斬獲及總後營賊聞風遠竄  
境籍以安嶮石之役非戰之罪也子禦霞少補弟子員  
好學有大志適賊逼鄰鄉率眾逐擊奮不顧死父子皆  
有義烈風

惠州府志卷三十七

人物

孝弟

宋盧邵義博羅人字和夫結廬大屏山下躬耕以養母好讀書通百家言十年不出母歿躬自築塋廢櫛沐鄉人稱孝焉皇祐中以特科授都官員外郎終朝奉大夫祀邑鄉賢子彥亨別傳政績

明陳範龍川人早喪父事母以孝聞永樂乙酉舉於鄉歷官湖廣麻城學教諭衡州府教授奉母就養承順備至自製戲綵詞朝夕歌舞以爲悅秩滿乞歸終養後遷唐府長史慕親不置王察而憫之爲請追贈之恩大學士

楊榮嘗贈以思親辭三章祀邑鄉賢

莊敬字允恭河源人髫年通經史性澹榮名天順二年由貢例應授東平州壽張令不願仕赴京告終養詔嘉其孝行賜七品文林郎服還里奉親備極色養訓子孫讀書林居二十餘年五與鄉飲終年八十六

陳健博羅人正統十二年舉於鄉少與潘本愚方暹讀書羅浮忍饑啖藜夜不設榻初任江西撫州訓導遷廣西荔浦教諭以聘分校山東鄒魯名士多出其門丁母憂歸居喪水漿不入口者數日廬墓三年鄉里稱孝上其事於臺司下檄旌之祀邑鄉賢

黃縉字朝用龍川人早失怙事母孝謹少居庠序有聲教



授熊大觀爲記春暉堂以揚其孝思天順四年歲貢授  
温州府推官忤權貴幾陷不測延辨復官九年致仕家  
居澹如也性剛正篤行誼而孝弟無閒言知縣秦宣立  
孝廉匾以嘉之祀邑鄉賢

曾綸博羅人成化乙酉舉於鄉授柳州府同知善事繼母  
每飯必待母而後敢食雖貴不改母亦歡豫如已出鄉  
人無閒言

李仕軒字尙志博羅人成化庚子舉於鄉任萬安訓導奔  
親喪星夜行歸泣奠如禮旣葬廬於墓側哭則羣鳥悲  
翔廬前泉忽湧出味甘列邑人異之事聞詔旌其閭學  
行純謹起除壽府教授升伴讀紀善轉修正庶尹卒於

官祀邑鄉賢

廖寬字克容海豐人質直秉禮親喪方葬寇突至衆奔匿寬獨不去躬築墳塋畢依依不忍反居常語及親輒涕泣鄉人稱其孝仕爲安慶府訓導祀邑鄉賢子觀海由鄉舉歷官郴州府教授廉謹有父風

何宇新字子元博羅人性至孝父滔早卒每遇忌日輒悲慟不食事母甚謹母卒水漿不入口者七日號泣不絕聲獨居於中門之外不盥不櫛不爐不扇衰絰不去身既葬躬率子弟負土成墳廬於墓側三年形毀骨立哀動人鬼時有翔鳥馴虎梅實竹萌之祥咸以爲孝感狀聞詔旌其閭宇新嘗游白沙陳獻章之門獻章書卓行

二字并遺以詩曰遶舍烏成陣終年虎臥門山梅初並  
蒂冬竹又生孫耿耿天公識明明國典存千秋何孝子  
不愧史官言蓋紀實也後宏治己酉舉於鄉仕爲南京  
光祿寺良醇署正秩滿遷宗人府經歷請告展省卒於  
家祀郡邑鄉賢

袁賓字尚賓歸善人宏治乙卯流賊夜掠其鄉賓猝逸去  
俄聞其繼母俞被執復詣賊請釋母繫已賊從之旣而  
官軍追至賊縛賓於樹終不忍害後仕終建陽訓導祀  
郡邑鄉賢

韓孟良字元善博羅人孝弟廉讓執親喪泣血三年正德  
八年舉於鄉初仕建陽教諭歷官顛撫二郡通判以能

官顯親膺封褒始乞歸行李蕭然所得俸與兄分之論者以爲篤行士

唐光字汝晦歸善永平人性行孝謹正德己卯鄉薦授城步令首革株連之訟居官未及一載以母不能其水土三疏乞休士民遮道泣留光口占慰之云喜檄何心半載間星輶已駕不須扳河陽自是栽花地爭看潘輿花下還衆乃收淚爲別家居一年所而母卒終養喪葬得盡其誠子廷麟舉隆慶丁卯楊起元榜宰興安有聲厚和無物忤有父風

任錫休字慎爾歸善人五歲喪母依祖母劉迨事繼母克孝盡敬父母卒哀毀廬墓學使旌之正德庚午歲饑捐

粟二百石助賑又捐助修文昌官及改建學宮樂善好  
施不倦祀邑鄉賢

鄒子盛博羅善政里人世力農正德十四年兄子能鬪殺  
人既就逮子盛痛兄老無子自詣有司曰殺人者子盛  
也有司遂議子盛抵嘉靖七年慮囚使者書囚籤向籤  
室祝曰寃者躍出子盛卽躍出使者平反之減死論譴  
戍潯州衛子盛至衛習戎事與妻會以樵蘇自給妻亦  
無怨言後以從征有功授總旗歸拜先塋髮種種矣見  
者泣下久之妻死妾子繼戍妾請曰君代伯兄死神人  
所共知盍歸乞分助役田兄亦願弟戎行有資耳子盛  
亟止之後其子自歸告子能子能不顧於是族人責子

能曰弟不惜死汝惜田乎乃從之里人以此益賢子盛  
嘉靖三十一年子盛死於潯戶部尙書郎胡世祥傳其  
事

鄭原轆字子容河源人事親孝待鄉鄰慷慨仗義濟貧恤  
物不吝解囊正德初善行聞於朝詔旌孝義授官秩享  
壽八十八乾隆六年祀忠義孝弟祠

康與棱龍川人執母喪哀毀朝夕不離殯側母性畏雷每  
有雷與棱輒號泣曰與棱在此

侯相歸善東平人孝事繼母嘗因母怒跪榻前母就寢相  
竟跪達曙母覺曰汝猶在耶曰母未命兒起不敢也母  
大感悟慈愛遂篤學使劣其文以孝特廩之後以歲貢

授南平訓導自以不能迎養月移母半俸以半自給蔬食而已以艱去遂不復出解元黃錦其師也錦歿而妻在相歲時餽問起居至老不衰中歲喪偶有二子遂不復娶常至乏食泊如也子若孫俱補弟子員祀郡邑鄉賢

廖日恆字守貞歸善府前街人事父母孝病嘗刺血和劑嘉靖十四年貢入大學授福清縣丞以惠政著棄官歸不問家人生產惟以書自娛課子孫學行喪偶不續其友愛手足好周恤多長者之行云

黃曙黃崇牙博羅人汝隆孫曾也曙膺嘉靖十人年歲薦未仕最能孝事繼母順承典體無不得其懽心而還遺

金裂重券救活二命皆仁親之推也崇豸以萬曆十三年歲薦授南海學博建宗祠以繼祖父志卒遺命其子蠲租四十石爲世祖蒸嘗里中嘖嘖誦黃氏世德

曾渙字至文博羅人幼喪父事母孝從兄漢亦早孤渙視如同產視漢母猶母也爲人淵篤而溫文同輩樂與共學卽長者亦爲忘年交嘉靖丁酉秋試時渙文有名矣明日當入闈聞漢訃卽棄歸其至性過人如此素好施有逋責者每爲焚券鄰喪貧不能舉者賙助之見暴骨必具槥以掩庚子舉於鄉年二十九卒無子鄉人哀思之

殷顯博羅曲澁人從翟宗魯遊力行古道動不踰矩事



母如母父死悲號水漿不入口者三日既葬廬墓側忽水淹墓鄉人以筏渡之辭以親在何筏爲水尋止賊三過墓相戒勿犯諸生會迪徐邦等上其事察院委邑學博徐璟抵其家褒獎之

馬叔康河源大洲都人性至孝弱冠補邑庠生未幾父歿廬墓三年棄諸生代父養祖督學衣巾之旣而祖歿又廬墓三年及母卒亦如之有甘泉湧於墓側白燕三巢梁間鄉人咸異之聞於院道萬厯戊戌旌其廬祀邑鄉賢

謝灌字用孚歸善人弱冠父光卒灌歔粥不御酒肉蔬果衣表裏皆粗麻日夜號泣擗踊母慮其過毀屬其從叔

憲規之稍益衣食灌雖涕泣後母命而哀不能已後二  
年竟以毀卒葉春及爲傳其事

按葉春及傳論畧曰灌死人咸咎灌不孝咎憲導灌  
不孝得首罪嗚呼世人難於爲善而易於媒孽人之  
不幸甚非所以勸世立教也楊載鳴亦曰灌之事余  
取其志云爾蓋士喪禮之不講也久矣

凌世科字道傳歸善中所街人父雲官嘉善教世科隨之  
任漸染於學博洽多聞年六十餘乃貢以母春秋高絕  
意仕進貧僅供菽水權如也以父名雲終身不着雲履  
亦宋孝子徐積不踐石之意與

李可仕博羅諸生性至孝少從其叔會督學魏校令郡邑

學皆行射禮至延射可仕赧然於是叔有子矣則辭歸  
兄弟拒之謂其出嗣久已析產卽歸不復分與也可仕  
曰但得母事之多矣已歸事母益謹母卒廬墓三年初  
母憐可仕無分乃以自贍市廛歲入租遺命與可仕後  
諸姪有煩言卽讓退之可仕顛撲嘗火兄弟爭救金帛  
可仕獨抱主離火道而立再火如之故貧特甚假托市  
肆主之外無長物也客有譏者輒曰兄弟有金吾有主  
可謂無所存哉張政熙以爲賢者有志未遂後賊踞羅  
浮上書求自効邑令嗤爲狂置之

潘維垣字守卿歸善人有至性方十齡承父命卽能盡其  
力不避勞苦補郡諸生與兄維藩齊名貢南雍聞兄卒

其民然後連兵四討寇不足除矣桂芳以爲然遂上其事隆慶四年檄林天賜城永安以讓爲巡方讓以軍法部勒其備四閱月而城成讓之策也是年與二子及家健甘得權等爲知縣陳哲將鄉兵攻殺賊劉漢江明年破擒賊蘇允山啓愚得權被創死又明年督府殷正茂大舉討賊讓散家財募敢死士百人從監軍道顧養謙爲衝鋒把總與永安令陳立中至各巢說賊各以精銳從抵南嶺賊江萬松據險抗師七日讓說之請自爲質誘出賊黨兵乘間奔入啓魯以父在賊中急引所募士大呼先登斬十七級奪讓歸魯復被創死讓前後帥師破泥山簾紫嶂施坑南嶺等巢凡斬渠六首生擒百五

十賊帥三說下賊巢四降賊一千七百四十八還俘一  
百二十八當事屢加厚賞讓志報仇功不自居也推與  
同事以冠帶哨官終久之有巡按御史訪孝節之士邑  
人咸上言御史異之授以義民冠帶辭曰讓遭不辰禍  
及先壠破產贖骸子職常事何孝之足云至於待罪行  
間賴天子威靈大將指麾殺賊以雪家恥敢言功績乎  
直指益異之初啓愚戰死知縣陳哲葬而表之及啓魯  
死無表之者萬厯十九年邑人請於縣爲魯建祠讓年  
八十一長樂志以考終三十六年詔旌其閭豎坊於永  
安縣曰一門三孝舊志稱其殲國賊以雪家憤有古烈  
士風讓工詩詞善書

唐宙字一甯歸善永平人少以孝友聞選貢授平海衛學  
訓按院以文行俱優薦拔之因母年八旬未獲迎養憂  
思成病未幾遷知僊遊縣未任而卒

韓鳴鳳字伯儀博羅人萬厯元年癸酉與弟鳴金同鄉薦  
父任邵武訓導奉母之官而母卒於撫州旅次艱慘扶  
規歸厝爲廬柩側泣血三年父卒已歸葬守墓哭泣如  
母喪時有翡翠巢其簷阿巨鳥集門外人目爲孝感後  
仕高郵知州河嚙民居捐俸拯溺掩骸不辭窘瘁以擒  
治巨猾忤郡守改知沅州賑饑救焚全餉額以給戍士  
境賴以安因爭割沅邊地添設天柱縣事中黔撫螯棄  
官歸築永思亭居其中忌日必持服啜粥執終身喪生

辰適當母諱垂老未嘗受觴祝壽七十以子日續累贈  
禮部右侍郎祀郡邑鄉賢

韓鳴鸞字伯雝博羅人年十三從父謁選出入侍奉唯謹  
每夜數起視衾枕父司教懷安病亟醫禱力竭致爲割  
股和羹以求療治生平一言一動不敢忘父母顏其室  
曰敬遺堂以誌永慕其處友必直諒課子姪甚嚴里人  
有不善惟恐其知也邑令式廬造請則避之直使觀察  
下檄旌其門曰隱士之廬年七十七卒

章尾字文偉海豐人萬厯辛卯舉人孝友天植廉讓性成  
知蒼梧縣事以母老不能隨任遂解組歸養推廣親仁  
族里皆沾其惠淡世味惟以一經垂訓而已





翁如壯歲喪妻不再娶爲人和易喜施予太平堤圯捐貲修築其學不懈於古督學會旌獎之

黎倬字榮爵歸善人年十三喪父泣血廬墓三年奉母備至時多盜東平未城爲鄉人畫防禦策造鄉約所集衆講六諭大憲召見以冠帶匾額旌之倬遂建議城東平傾其貲無吝長子化中歲薦孫遵指鄉薦別有傳

劉相一字萬鍾龍川人年十一父渤當貢卒哀痛如成人事母順養備至旣壯母歿益哀慕不自勝邑縉紳黃宸何倣贈永思扁以表其志嘗與宸等捐貲重建龍津東甯二橋老猶日稽史籍課兒孫不問俗事萬厯六年詔授冠帶子眺舉於鄉

林子韶海豐諸生父病韶割胸治之愈郡縣獎之

黃一綾海豐所軍母病篤藥罔效綾日夜痛哭割胸治之而愈部使督學咸獎之

廖述字繩武歸善人孝事繼祖母以祖母老不忍遠離讓  
貢於同列生祖母卒始應萬厯庚子歲貢教授淮安子  
祖秀邑諸生以貢授武英殿中書差固原督餉時流寇  
梗道祖秀冒死至邊以安軍心事竣遂尋初服著有西  
北游草父子皆以厚德稱祀邑鄉賢

游應蛟字南溟歸善人事親孝能以色養父母或有忿怒  
極愁鬱見應蛟卽釋然萬厯丙辰歲貢訓導石城遷揭  
陽教諭海寇猝至邑令堅閉四門城外民不聽入應蛟

泣涕請於令門始開全活甚衆其推廣親仁皆此類再  
遷梧州教授歸甲戌飢捐賑以濟九舉鄉飲年八十三  
終祀邑鄉賢

錢夢蘭字國馨歸善縣城西門人明經萬選子也六歲喪  
父哀戚如成人事母廖以孝聞母歿登崇正庚午賢書  
賀客至愀然曰永感之下何賀爲建陟瞻樓以寄思親  
之志嘗讀書里塾有鄰女就之拒弗納婦車生八女屬  
買妾旣成詢知有夫以貧割愛也卽還之弗問聘貲改  
娶殷氏而婦車連舉三子妾亦生子人以爲拒奔還妾  
之報焉生平好善樂施後以東莞教遷雲南曲靖通判  
攝郡篆再遷漢州牧皆以德化其民尋乞歸與里子弟

談文史理太極洪範諸書淡然初服云

姚師堯字用華歸善人憲副姚祥裔孫少以文名食餼於庠孝養不懈侍母病亦周星心力俱瘁母歿女兄爲母所愛事之如母崇正丁丑以貢任高要訓導課士多成就大憲薦推縣令卒於任五子皆以詩文稱

姚師夔字周和師堯仲弟歸善諸生孝友樂善常行了凡功過格周恤貧寒收葬枯骨以長子子莊貴卒贈文林郎

翟紹高字翼明歸善人性孝友年二十淹貫性理子史餼邑庠爲學使魏浣初所器重善事繼母撫異母弟如同產讓宅讓財攜持成立伯兄嗜酒無度泣諫止之崇正

中應詔舉孝廉老猶力學著有焚餘香尙書蔡沈約旨  
鄉邑仰望爲多士師

馮道揚河源人善事父母菽水承歡親歿前後廬墓六載  
哀思之切終身無閒督學匾旌之

歐大聰龍川人母古氏遘疾齋禱侍藥久忘勞瘁母終哭  
絕方甦孝感練雀來庭廬墓三年寒暑不知徒跣骨立  
值亂寇過而悲之院道扁獎曰明經孝子

歐治龍川人自幼孝親百里負米以養父母歿皆廬墓三  
年泣血殮風有虎馴蛇伏之應

駱兆運龍川人篤孝性成父病嘗父血溺以察症候知縣  
孫徵奎獎異之年至八十餘

駱斌字祿元歸善浦口人精於箕疇太極陰陽二氣之理  
事親以孝聞友愛昆弟父年八十七母九十一終身懽  
慕喪葬盡誠廬墓左兩逾歲一日過解犀橋有叟墜水  
援起亡其金叟窘急欲自溺死斌探囊金與之叟泣謝  
去不自德也處族戚敦睦仲子鳴雷別有傳

徐繼周博羅諸生嘉靖四十一年河源賊李亞元流劫村  
市繼周奉母出避匿叢薄中賊搜獲母繼周出與賊敵  
奪賊刀相持不下一賊從旁斫之傷又一賊曰彼爲母  
故何忍再傷之舍而去越日傷重死人咸哀之

周觀福海豐人年十四補弟子員旋食餼七歲時父病劇  
觀福避人焚香禱天割股和藥以進父病隨愈家人莫

之覺後察其創痕方知其故知縣董御史洪學院戴俱  
旌之

彭光遠字秋鵬海豐歲貢性孝友值兩兄先故光遠撫孤  
姪如已出卒皆成立初任瓊山訓導繼調文昌旋陞南  
雄教授推誠待士士悅服之

陳曇字爰綺博羅廩生性至孝弱冠失怙哀毀骨立侍每  
病衣不解帶者三閱月母沒泣血廬墓三年

劉祚元長甯人崇禎間諸生性純孝父病日夜侍奉衣不  
解帶父歿哀慟幾絕結廬墓側號泣三年服闋應試在  
場中忽念及父歿清淚涔涔竟忘損濕試卷也且孺慕  
之語形於篇牘榜發置下等後學使者知其故憐之改

置優等食廩餼焉

黃綾海豐所軍母病篤百藥罔効綾痛哭禱天割胸治之  
病尋愈督學使者旌之

陳延圖字東繩歸善鉄爐湖人定安教諭端蒙子也事親  
孝崇禎壬午與從兄延錄同乙榜丙戌遭亂奉母氏韓  
避地博羅丁亥城陷母亟揮圖行所親或止之圖曰母  
死吾何之遂同遇害

黎化淳字彥熙歸善黎俸季子郡庠生性篤孝四歲喪母  
哀泣動人比壯多名士交慷慨好義時拯人之難而垂  
老孺慕不衰每逢親諱辰悲念益切

劉耀祖字允升歸善邑諸生性醇謹篤學幼喪母事父能



養志事繼母如母執親喪前後皆廬墓三年人稱劉孝  
子嘗捐田百石爲祭費捐墟稅歲入四兩爲科試卷資  
立碑於學長子挺萃七歲有神童稱天啓辛酉舉於鄉  
孝友有父風著有四書經正音

黃應宸字道翰海豐人幼穎慧天性孝友嘗捐租以拓祖  
業割產以讓兄弟貧乏者每焚券不責逋居恆潛心典  
籍寄跡林泉邑令劉稱爲聖世逸民中丞王書墳簾堂  
贈之其嘉言善行睦族宜家皆可法式以子守謙貴贈  
戶部主事

吳昌祚海豐人幼敏穎喪所恃哀毀如成人事父以孝聞  
旣壯父歿痛瘡骨立事伯兄如父分產輒讓其腴至老

未嘗以詞色抗弱冠補邑諸生試輒居首崇正間歲貢  
廷試歸歎曰不用於時其敢忘吾分內事耶割金更構  
宗祠立贍儒產著宗規族人負輸幾數百緡昌祚爲代  
供置義田甦族困焉邑經海寇十年中凡三大飢爲賑  
穀數千石邑令李式其門稱全活萬人卒年六十

李子昇字升之河源人父歿始生事母江純孝孺慕終身  
爲人端嚴不苟言笑弱歲居邑庠屢以德行薦旋拔恩  
貢生平博覽羣書工舉業再中副車教授邑弟子成名  
者百餘人年未六十卒學者稱晦雪先生

翟祖祐字憲申歸善人紹高季子隆武僞科乙酉鄉薦博  
極羣籍下筆滾滾不休少孤事母至孝先志順承母歿

作孺子哀者三年終身悲思不已居恆和氣藹然及事之曲直是非持之慍慍人咸敬憚之乙卯修郡志士論推重焉

國朝李必彩字士樛歸善松柏嶺人丙戌恩貢孝父母諸父有欲以爲後者不忍離所生固却之致訟於庭不得已以子嗣焉而以其產分給諸昆弟之貧者方寇破寶岡族親被執貧不能贖輒代贖之解紛拯難至老不衰嚴森歸善邑諸生孝事繼母晨起督一老僕耘鋤且行且誦好救人之急年八十一卒仲子雋臣以貢官教諭孫對揚溫和孝友順治舉人知四川綏陽縣興利除弊蒞任僅五月以病乞休

龔克孝字錫永歸善人五歲而孤哀毀如成人所後父母如所生撫兄姊之孤不異己子順治戊子己丑薦飢克孝減己殮以飼甥姪從兄克修仕漢陽以卓異赴都道卒克孝匍匐數千里迎其喪以歸又嘗以惠民凋瘵陳之當道夫役得減其半人多德焉卒年七十祀鄉賢子章入翰林另有傳

彭賡皇字火母陸豐人明崇禎壬午舉人順治丁亥值寇亂母遭擄罵賊死賡皇號天搶地矢志滅賊以報母仇丙申揭陽賊入寇賡皇馳報惠鎮撥兵直搗霖田身率鄉勇奮力除剿因條陳弭寇情形請就霖田都設兵防守大吏嘉獎之

謝復培字啓初連平州人事親愉順老而彌篤父歿哀毀  
幾絕旣葬廬墓哭奠有司申請旌其門及母卒復培年  
已七十八慟如故嬰疾猶卧苦塊年八十服未闋而終  
遺囑子孫以衰服歛云

龐繼則歸善人性孝友父病日夜侍側衣不解帶及歿結  
廬墓下終身哀號聞者知爲臯魚之慘也康熙三十四  
年祀於鄉校

嚴淑虞永安人性至孝五十年子舍養志承顏無倦色親  
歿結廬墓側哀號動人康熙六十年旌表

何以平永安諸生品端行方事父母克盡子道前後兩喪  
共廬墓六年哭泣不間寒暑縣令表其門雍正五年旌

謝特銓字簡卿連平州人庠生素行端方屢舉優行母卒  
咯血骨立欲廬墓以父命而止及事繼母一如所生父  
歿廬於墓左蓬莠不蔽風雨終制哀泣不輟州守於庭  
弔旌之曰純孝可風

蘇振耀字光宇歸善人康熙十三年隨征潮州有功補惠  
協右守備以喪母哀哭失明乞休奉 旨嘉其孝以原  
官致仕

任鏡字心友歸善人孝事繼父母執生母喪哀毀骨立年  
八十有一長孫一麟領鄉薦

廖雲師字紀伯歸善人以母老絕意科名朝夕侍養母喪  
三年喜怒不見顏色撫字幼弟無私蓄長孫正發甲午

舉人

馮星耀字壽次歸善人孝事繼母以明經薦於鄉父病籲天請以身代父卒幾至滅性弟無出乏嗣以子承其祀樂善好施人皆德之

楊廷春字北沾歸善文懿公嫡孫也嗣伯後嗣母患疽醫不能治以口吮其毒遂愈鄰火延燒將及嗣父棺冒火救之天忽雨得不燬人以爲孝感撫育孤姪弱甥完人骨月畧無德色邑舉鄉賓學使旌其閭著有惠郡鄉賢考村居襍詠并所輯祖父書行世年八十二卒雍正間祀忠義孝弟祠并祀鄉賢祠

李奕源字本德歸善諸生松柏嶺人肄業成均需次縣丞

因親老不仕歸事嫡母生母以孝好施予數以貲助族人婚喪邑有飢疫捐粟施藥全活甚衆卒時遠近弔奠者以千數

翟祖授字繩武歸善人逢亨之後居白鶴峯下邑諸生以親老不應舉孝事繼母家中貲代舅氏力償官逋人有三子俱爲賊所掠祖授憫其無後力爲贖還亦其孝思之所推也康熙間舉鄉飲

廖磨泰字子周歸善人康熙歲貢性孝友內外無間父母歿喪葬諸費皆自任不以派弟姪撫孤姪三甥皆爲完婚娶絕無德色人稱長者

陳友思字術若長甯人少補弟子員性至孝幼時侍母病



不離左右母歿朝夕號泣如成人及長事父與庶母先  
意承志內外無間言同居兄弟子姪十數人皆率以友  
讓一室藹然族黨有緩急樂周之旋以父喪哀毀未幾  
卒年僅四十有二

謝良幹長甯城之太平坊人六歲喪母繼母郭氏未幾父  
亦亡家無遺產幹惟授蒙養母或稍不如意輒委曲承  
之雖勞不怨嘗進羹糝郭怒不食幹跪膝前必怒解嘗  
食乃敢起後郭老疾穢床幹親澣濯郭年九十一歲終  
幹亦七十有餘矣哀毀骨立爲孺子泣友愛異母弟撫  
其遺孤若已子生平一介不取行步不回顧可謂大行  
克敦

李夢祥長甯人雍正間邑庠生性至孝母余氏歿結廬墓側朝夕不離泣血三年未嘗見齒敎諭雷儂以爲難能題匾旌之

曾同登字誕先龍川人順治間由明經歷任三水德慶高要學性至孝每朔望禱於城隍願減算以延母壽母壽九十六終時同登年逾古稀哀毀骨立云

陳忠長甯人幼喪母年十六父又喪事繼母卓氏孝養備至萬厯間流寇肆虐鄉人俱避入山谷忠以母病不能走泣依膝下母促之終弗去寇至得其情舍之母歿泣血哀毀盡禮廬墓三年有一蛇馴伏與之處觀者異之以爲孝感所致邑令過其廬禮之贈以匾曰孝行絕倫

羅宗祥長寧城南人康熙初由歲貢任四會訓導少失怙  
事嫡母生母皆得堂上權異母兄若弟二人怡怡然迭  
爲師友同羹共被者四十餘年鄉有酗酒故犯者宗祥  
置不校異日其人負荆造門祥曰汝何嘗辱我也其寬  
厚大抵類此在任獎勸有方無慙師道解組家居十二  
年卒年八十二

莊德萬陸豐人早失恃十歲隨繼母避賊賊至亟藏母而  
挺身受擄賊感其幼且孝憐而舍之一日其父失金歸  
至廢寢食德萬隱貸金如數佯作尋獲狀父悅之有馬  
姓者寄金遠出尋物故德萬攜金跋涉千里送還其家  
生平善行多此類

黎文炳字伯章海豐人孝友性成母病篤焚香露禱割股  
和藥治之病旋愈族鄰報縣申詳督學准以衣頂榮其  
身學博贈匾曰行篤天倫

姚亮字揆任歸善人康熙三十九年歲貢性孝樂善喜施  
讀書西湖醒泉郡守鍾明進雅重之雍正二年舉祀孝  
弟祠

何嵩字連溪連平庠生少穎悟年十四遭母陳氏喪哀毀  
盡禮事父與繼母劉孝養惟謹尤友愛同產弟欵異母  
弟桂分產時推父業與之門以內怡怡如也桂早世遺  
一女撫之如已出處宗黨善排解存心利濟人推厚德

云

何多才字若周連平庠生事二親以孝聞課督子弟皆取  
科第去康熙丙戌春有礦徒數百將劫掠值州牧出境  
城垣傾圮衆皆倉皇失色多才談笑自若密授機宜於  
守城把總整兵伏嚴守禦礦徒知有備也卒無患歲癸  
巳大飢力啓州守倡捐分賑全活無算性豪邁賓客常  
滿座手披口答有劉穆之孔文舉之風

車廷輶字君美博羅副貢生少孤事母孝母病劇清夜焚  
香禱天願減算以延母壽病尋愈母目失明朝夕以舌  
舐之母歿泣血哀毀盡禮後授三水教諭居官十載清  
苦自若未幾卒於官邑人士醵金賻之

韓元文博羅生員性孝友母歿及廬墓三年有司給匾旌之

何龍字天木博羅庠生少失怙事母克盡孝道母歿廬墓  
三年生平善畫所寫蘭竹人甚珍之

鍾瓊博羅人友愛諸弟析產時推肥取瘠怡怡如也丙午  
歲饑瓊率諸君昆出穀六百石分貸鄉鄰又命子象鵬  
收瘞孤骸於曲隴凹并設無祀壇祀之

林瀚字海若博羅歲貢幼失怙恃因兄食指衆析產時以  
腴田讓之迨兄年耄復迎請同餐焉

黃錫鑿字淬純博羅人乾隆丙午舉人事繼母以孝聞嗣  
授海康教諭與諸生講學吟詠多所裁成所得廉俸養  
親外一無所私旋丁艱歸築遂初草堂不復出

顏子佐字翊皇連平廩生事父母循謹無違母林氏晚多

病子佐躬親湯藥衣不解帶母歿哀毀骨立率諸弟事  
父常得堂上歡代父督諸弟讀尤嚴勤後皆接武成名  
子佐之教爲多性方正遇事直言事過輒化人咸推重  
之

黎學成河源人由明經選授順德訓導事繼祖母侍奉惟  
謹祖母歿喪葬盡禮事母亦克盡孝道母壽八十有六  
終學成旦夕痛哭哀動行路焉

曾羽宸字如三龍川增生父母年逾八旬兩兄繼故羽宸  
克盡孝道承歡無間撫孤姪如己子值明季寇亂倉卒  
不及避爲賊所獲賊悉其孝友舍而去遂得免於難

賴之存字參唯連平諸生菽水事親孝養彌篤父母歿哀

毀號慟扶而後起性耿介處貧困淡如也生平足不履  
公門而義氣侃侃有古俠士風

吳日寬連平人母徐氏歿廬墓三年服闋哀痛如初署州  
牧邵大成以孝行可風旌之

沙祐字羽君龍川明經少失怙事母盡孝母歿泣血哀動  
行路每逢家祭痛親歿輒涕泗交頤數十年如一日學  
問淵博教授生徒多所成就焉

駱萬護字布叔龍川明經事繼母撫諸弟以孝友聞父遺

• 有產業悉讓諸弟晚年病甚諸弟乃均分之以分單付  
其子而萬護不知也生平博覽羣籍舉動必以禮自持

人尤服其嚴正云



王作楫龍川監生性至孝父母病侍奉湯藥衣不解帶父歿泣血廬墓三年後母氏歿亦如之太守伊秉綬贈以匾曰純孝可風

陳瑄陸豐監生性至孝弱冠遭父喪哀慟幾絕事母許氏孝養惟謹母病親嘗湯藥及歿竟一慟而逝邑令陳旌之曰爲廢蓼莪

鄧慶福博羅人冷水坑農也咸豐五年賊攻其鄉時福父自明年八十有九老不能行遣福速走福固以出逃請負其父匿芋田中賊至被虜不屈殉其父死年五十三張法祖河源人少孤事母鄙承顏順意務得其歡家貧常率妻子忍饑而母之養不少缺及母歿留其宅營葬結

茅舍於墓號泣不輟妻業芻以給其食往往斷炊云

鄒可仁歸善人父興朝早卒家無遺產母藍憂之可仁日  
兒力壯庸何傷乃賃圃數區藝而供母不給則佐之以  
樵每鬻薪歸輒閭閻道市中瑣事以博母悅母安之幾  
自忘其困乏也母死廬於墓邑宰孫能寬請於 朝旌  
之

黃林炳小字稱歸善人居郡城事母孝家貧以醫行於鄉  
得所贈金盡市甘旨以養母母卒葬於西湖豐山日將  
昏卽攜一敝衾詣墓拜訖謹守不去獨臥叢冢間月黑  
燐青慟念及母淚輒泫泫下如是者三易寒暑一夜夢  
其母索食歸市妻所畜豕備牲醴購冥鏹祭於墓妻以

斷炊告炳掉頭弗顧也嘗以穉女許婚某子未納采而  
某卒其家日落子復轉徙無耗有勸之改婚者炳笑而  
弗答卒訪得某子命迎其女以歸又嘗爲海豐某貸金  
二百某旋黨於賊聚攻府城密致書於炳願倍償其母  
炳罵曰汝從逆不改尙欲以盜金污我乎峻卻之卒自  
償所貸其重然諾輕財賄又如此年六十有奇卒或謂  
炳本他氏子黃母撫爲己子尤見其天性難及云

吳二歸善人少孤貧采樵養母母有所嗜立市歸奉母不  
以匱乏少吝人重其誠篤許厚給以值招往傭作二日  
棄親弗顧心何以安固卻之終其身未嘗離母側母病  
奔走求醫藥寢食俱廢歿無以殮鬻其室營葬結茅舍

墓旁泣血年餘病不能樵遂與乞者伍族人憫之假室  
一椽以居二二歸之日形容憔悴猶扶病日省於墓或  
贈以黍肉必攜之往祭每祭必泣老而不輟族人哀其  
志比二卒耐葬於其母墓

張帆號湘航歸善人道光己酉舉人性孝友甘淡薄家貧  
典衣購讀授徒所得束修悉以歸兄雖諸姪耗蕩弗計  
也有勸之析爨者曰吾豈重貲財薄骨月乎聞者歎服  
旋因甲寅寇亂倡立保和社團練鄉勇攻巢擒匪迭著  
勞績事平 賞加中書科中書銜

邱善經歸善人諸生兆昇子也兆昇性謹厚鄉里有長者  
稱善經能繼之一門之內雍雍如也兆昇晚遘疾臥牀

禱善經躬侍湯藥未嘗離側歷數載如一日比死廬於墓哀哀時作孺子泣聞者傷之年七十有三卒

王崇維字立中歸善人性至孝父茂貞中年邁瘋疾別築一室避居山僻戒家人勿至崇維日往省視依依不忍去父畏雷遇陰晦時奔父所侍父父斥之去不去歲以爲常而終身未嘗染疾人以爲至孝所格云與妻嚴氏同登壽考五代同堂歿年八十有奇

曾天祥歸善人少孤事母孝家貧躬耕養母能得其歡心比歿廬於墓嘗夜夢母囑曰明日虎至汝宜遠避天祥晨起出耕適大雨驟降路阻不得返越日返果虎跡交錯人以爲孝感云

長少凡云 卷三十一 人物  
廖有全字應芳歸善人居平山家貧傭力養母能得母氏  
歡咸豐五年寇再攻平山全操戈禦諸河戰敗馳歸負  
母逃逃四里許而賊追至刃其母全置母於地以背受  
刃賊刃交下不少動同奔者憤呼反救母得救而全喪  
元僅留其尸刃傷數十處見者淚下後五年母始以考  
終

鄭億歡歸善人監生子奇子生平事父孝父歿葬於馬鞍  
嶺結廬其側哭泣之聲哀動路人行者避之故道遂因  
之廢

附輿甯長樂縣

明曾瓊長樂人成化丁酉舉人任龍溪教諭秩滿自免歸  
狷介獨持不履公府親喪廬墓朝夕哭奠不問家室事  
人以馴行孝謹稱

顏琛長樂人以監生授荊州府經歷致仕事父母孝父歿  
哭奠葬祭一遵古禮母歿哀毀如父及葬淫雨彌旬琛  
焚香籲天雨卽止成葬雨如初廬墓五年又建望塋樓  
時時登望作孺子哭鄉人感動有司以孝聞詔旌其里  
閭

魏珏長樂人兄理誤殺人官捕之嚴珏以兄無子匿之自  
陳曰殺人者珏也鞠之不易款斃於獄人以爲難

王天爵興甯諸生以母老歸養不敢離兄天與無子倫序  
當其子爲後讓其姪曰姪猶子也撫遺孤邠如已出遇  
公事人方鼠竄彼獨身先其私也衆方蠅營彼獨面赤  
祝令允明楣其門曰忠孝人家

曾尙綸長樂清化都人友愛兄弟僉憲施公題友于堂額  
以表其宅復贈之詩田氏荆花今再發姜生故被又重  
新須知聖化沾濡久炎海分明見魯麟

劉袞長樂清化都人少失怙家貧習舉業袞痛母氏朱苦  
節孀居乃竭力承歡日必迎坐於庭端拜侍省母歿喪  
葬一循乎禮廬墓數年迄終身孝思無斁焉

王元賓興甯諸生嘉靖四十四年流賊攻刦安明寨其父



以弟在內料寨必破命元賓往救叔元賓率勇與賊戰  
自辰至未斬賊十餘級力竭被殺勃勃有生氣子名世  
痛父死非命終身不御葷酒事母以孝聞已塋廬墓三  
年人稱父子全孝

林一喬長樂人業儒孝母家赤貧必多方措甘旨母疾與  
其弟一桂爭割已股禱天願以身代母尋愈後一喬病  
季弟一灑亦割股療兄蓋一門奇行云

羅萬象興甯增廣生讀書守禮言行必慎授徒不計其脛  
脯多寡嚴學規雖燕居必正襟危坐接見則藹然可親  
其事父母也寢食必視問病輒衣不解帶湯藥惟謹二  
親前後歿蔬食齊衰三年如一有以小祥宜殺禮者萬

象曰此宋儒之說非誦法孔孟所爲也其行已類如此  
卓宏字任之長樂人教授有瑞子也性孝友工詩古文詞  
試輒優等生平仗義父歿水漿不入口者三日哭奠盡  
禮不事浮屠及葬廬墓有述哀詩三十首皆南陔白華  
遺韻也應崇正壬申歲貢未廷對卒

王一依興甯人事親愛敬盡禮年十八縣府童試俱冠軍  
將屆院試聞母病卽奔歸親以機不可失爲言敕就試  
一依曰方寸亂矣烏能忍湯藥必躬親執母喪形毀骨  
立廬墓三載服闋補邑庠督學楊以孝無間言旌之平  
生睦族惠鄰賑饑周急惜不永年

李天楹興甯鄉賓自少孝事其親母將七旬忽患惡疾牀

尊垂十餘年朝夕服役不怠必躬親不假妻子恐生厭  
棄以忽其母也及卒廬墓三年人咸稱異